

USA KA BINILANGGO



...dinhi pag-usab, sa Ngalan ni Ginoong Jesus, ug aron mapatalinghugan ang halangdon ug gamhanang mga buhat nga gipangbuhat Mo, kaniadto. Ug karon ania kami nga nagatindog nga nagapaabot, nga maitaas ang among pagtoo ug madihogan kami, aron toohan nga kung unsa ma'y gipangayo namo karong gabhiona igahatag. Nasayod Ka sa matag usa kanila, ang tanan-tanan nga gihangyo nila. Ug ginaampo namo sila, ilabina, Ginoo, kadtong mga anaa na sa ngilit sa kamatayon. Ihatud ang pakigdait ngadto sa ilang kalag kung wala pa man kini dinha. Ihatud ang kaayohan sa ilang lawas. Itugot kini, Ginoo.

² Panalangini ang among panagkatigum. Among—ginaampo namo, Ginoo, sa niining Miyerkules sa gabii nga panagtigum sa pag-ampo, nga, samtang nagkatigum kami, nanghibalo nga kon diin man nga adunay duha o labaw pa nga nagkatigum, Ikaw magauban kanamo. Ug ginahangyo namo Ikaw, Ginoo, nga ihatag Mo kanamo ang Imong Pulong karong gabhiona. Magpakigsulti Ka kanamo, Ginoo, ug painita ang among mga kasingkasing, sa pagkatalagsaon gayud, aron mahibaloan namo kung unsaon namo sa pagpanton ang among mga kaugalingon alang sa halangdong panahon sa umalabot, kay nagatoo kami nga nagkahaduol na kami sa Pag-abot sa Ginoo.

³ Nagapasalamat kami Kanimo alang sa mga tawo karon nga nagasugod na sa pagkakaplag nga ang pagtoo bililhon diay para kanila, ug nanghibalo na kung unsay kahulogan sa pagtoo. Ug nanghibalo kami, gani nagapasalamat gyud Kanimo alang sa umalabot pa nga mga panerbisyo, nagatoo nga magabuhat Ka og usa ka butang. Ginoo, nagahulat kami nga may kahinam, sama sa mga adlaw kaniadto, nagatoo kami nga haduol na ang panahon sa diha nga pagaablihan Mo na ang mga bintana sa Langit ug igabubo ang mga saad nga gisaad sa Dios alang niining kaulahiang adlaw.

⁴ Karon ginahangyo namo Ikaw, Ginoo, nga—nga mag-uban Ka sa tanan, sa tibuok kanasuran, ingon nga nadungog namo karon nga daghan kaayo sa palibot, sa bisan asa, ang nagkinahanglan. Ihatag kanila ang ilang mga hangyo, Ginoo. Ug nagaampo kami nga makita ang gamhanang kamot sa Dios nga magapamuhat sa tibuok kalibutan sa niadtong mga nagapaabot alang niining dakung butang.

⁵ Pasayloa kami sa among kasal-anan. Badlonga kami, Ginoo, pinaagi sa Imong Espiritu ug sa Imong Pulong, aron nga mapanton namo ang among mga kaugalingon, nga mamahimong masinugtanon nga mga alagad, masinugtanon

nga mga alagad diha sa kabubut-on sa Dios. Itugot nga mahinumduman namo, ug paninguhaong hunahunaon sulod sa among mga kasingkasing, kung unsay gibuhat sa mga nahaunang Cristohanon kaniadto. Daw sa unsa nga matang sa tawo ang mahimamat namo pagmahinagbo namo ang maong mga tawong personal nga nakapakigttagbo Kanimo. Siguradong naiwagan gayud ang ilang mga nawong sa pagtoo ug kalipay. Siguradong ang ilang mga kinabuhi nahimo gayu'ng buhi nga Pulong sa Dios, nga "mga sinulat nga sulat nga ginabasa sa tanang mga tawo," samtang nagapanglakaw sila sa taliwala sa mga tawo. Dios, itugot kini sa makausa pa.

⁶ Hinaut nga bug-os gayud nga nahitugyan ang among mga kinabuhi nganha Kanimo, aron nga magkinabuhi ang Balaang Espiritu Mismo nganhi kanamo, ug magpakigsulti pinaagi kanamo, Ginoo. Hinaut nga matiman-an namo, sa among mga hunahuna, nga samtang nagalakaw kami sa dalan ug nagapakigbagnus og mga bukton uban sa kalibutan, pagatiman-an namo nga dili gayud kami angay'ng mahisama kanila. Ug igapadaplin namo ug hatagan ang mga niini og dapit, Ginoo, sa husto nilang posisyon dinhi sa yuta. Paga-ukoparon namo ang ubos nga posisyon, ingon nga nahibalo nga kami mga pinadala gikan sa laing kalibutan. Aduna kami og usa ka Ginghamarian nga haduol nang magahari, Ginoo. Ug dili magdugay moabot na ang halangdon namong Hari ug pagaharian ang tanang mga ginghamarian ilalum sa Iyang ginsakupan. Ug Siya'y magadumala ug magahari; kita ang makauban Niya dinhi sa yuta, sa usa ka libo ka tuig, ug kauban Siya hangtud sa kahangturan.

⁷ Sa paghunahuna niini, Ginoo, karon nagalaum kami sa katubagan sa among pag-ampo. Ginabalikan namo ang among pagsugid. Kung nakabuhat man kami og bisan unsa, nakasulti og bisan unsa, o naghunahuna og unsa man, nga sukwahi sa Imong halangdong kabubut-on, tugoti nga mahinloan kami sa Dugo ni Jesus Cristo.

⁸ Pangunahi kami, Ginoo, maingon sa gisulti sa igsoon namong babaye karong gabhiona, mahitungod kaniya ug sa iyang bana sa pag-adto nila didto sa Chicago. Pangunahi sila, Ginoong Dios, ngadto sa dapit nga mahimo Mo silang gamiton, aron nga mamahimo silang mga siga sa kahayag ngadto sa uban nga nagapangapakap sa kangitngit, nga wala makaila sa among Ginoong Jesus. Karon ginatugyan namo ang panerbisyo nganha Kanimo, ug ang pagpatalinghug sa Imong Pulong sa pagpanul-id, aron mahibalo kami kung unsaon sa pagpangandam alang niining dakung takna, sa Ngalan ni Jesus amo kining ginapangamuyo. Amen.

[Blangko nga bahin sa teyp. Nagasulti si Igsoong Neville—Ed.]

Panalanginan ka sa Ginoo. Salamat, igsoon.

⁹ Medyo wala ko kini gidahum. Ako, pag anaa ra sa balay, mabati ko nga kung wala ko'y kinahanglan adtoan, usa ka panghitabo nga kinahanglan gyud adtoan, mobati gayud ako og dili maayo, nga molingkod-lingkod lang ko sa balay ug dili motambong sa panagtigum sa pag-ampo. Ug medyo mianhi ako, nga wala ko gidahum, sa kaugalingon ko, bisan ang akong pamilya. Bag-o lang ko miabot, ug milakaw na pud dayon. Ug miingon ko, "Moadto ako sa panagtigum sa pag-ampo." Ug wala na siya'y panahon para mangandam aron sa pag-anhi, tungod wala man siya kahibalo nga moabot diay ako.

¹⁰ Ug nalipay gyud ko nga nadungog ang testimonyo sa atong igsoong babaye dinha, sa igsoong lalaki, mahitungod niadtong Kahayag didto sa South Carolina o North Carolina, sa kon asa man. Sa Greenville, ba kadto? [Nagaingon ang igsoong babaye, "Dili. Sa Southern Pines."—Ed.] Southern Pines. Oo.

¹¹ Ania si Igsoong Lee Vayle karong adlaw. Gibautismohan ko siya, karon nga adlaw, sa pangbautismo nga panerbisyo dinhi karon nga adlaw. Nakaila na mo kang Igsoong Lee Vayle, ug sa mga ministro dinha, si Igsoong Parker Thomas. Adunay usa ka . . .

¹² Mahinumduman ko ang—ang higayon, nga nalandongan ang usa ka igsoong babaye. Usa kadto ka dakung pagpamatuod, igsoon, sa kung unsay . . . Usahay padayon lang nga pasagdan sa Balaang Espiritu nga sulayan ang atong pagtoo, aron makita kung unsa gayud, ug sulayan usab ang pagtoo sa uban. Pagdirekta kang nagatan-aw sa usa ka butang, ug duna ka'y makita, ug isulti mo kini; unya motan-aw pud ang uban ug dili nila kini makita, moingon sila nga wala man kini dinha. Kita n'yo? Apan anaa gyud kini dinha.

¹³ Karon, walay ni usa ang nakakita niadtong Kahayag nga anaa sa ibabaw ni Pablo kaniadto, apan atua gyud Kini didto. Walay ni usa ang nakakita niadtong salampati nga mikunsad gikan sa Langit, sa ingon-niadtong Kahayag, nga porma, ug nagpaibabaw kang Jesus, gawas lang kang Juan mismo. Apan atua gyud Kini didto. Kita n'yo?

¹⁴ Ug busa, dayon, pagkahuman nga gisuginlan ko ang mga tawo mahitungod niining Kahayag nga sama sa usa ka Haligi nga Kalayo, wala gyu'y ni usa ang gustong motoo niini. Apan karon napaila mismo Kana sa mekanikal nga mata sa kamera, pagkatungha Niana.

Ug mangitngit ang dautang espiritu.

¹⁵ Sama ra usab kini sa atong mga kinabuhi, mga landong kita. Ug kita'y . . . Kung kita'y kahayag, kung nagasunod ang atong mga kinabuhi sa Kahayag sa maong adlaw, nan nagalakaw kita diha sa Kahayag.

¹⁶ Sama ra usab kini nga motan-aw ka sa gawas ug moingon, "Makita ko ang adlaw," pag-adlawan. Inyong—makita man

ninyo ang landong sa adlaw. Ngani usa ra kana ka aninag sa adlaw. Dili kana mao ang adlaw, mismo, kondili nagapamatuod ra kana nga aduna gayu'y adlaw. Nagapamatuod kana nga aduna gyu'y adlaw.

17 Ug karon pagmakita ko, kamo nga nagapanglingkod dinha, nga nagapamaypay, nagaestoryahanay, nagapasabot kana nga mga buhi kamo, apan usa lamang kana ka landong sa kinabuhi.

18 Tungod kay, ang unsa mang butang kinahanglan nga magkaaduna og kangitngit, aron makahimo og landong. Kita n'yo? Tungod kay, ang landong kinahanglan aduna og ingon ka daghan nga kangitngit ug ingon ka daghan nga kahayag, aron makahimo og landong. Ug dili kini puedeng puro lang kangitngit, ug dili pud kini puedeng puro lang kahayag. Kung kangitngit ra kini, mangitngit gyud kini. Kung kahayag ra, wala pu'y landong, walay unsa man nga mamahimong landong. Apan kung isagol ang kangitngit ug kahayag, nagapahimo kana og landong.

19 Busa kita'y mga landong sa kahayag. Mao nga nagareplektar kamo og kinabuhi nga gikan sa kon asa man. Kung ikaw, usa ka Cristohanon, ingon nga usa ka landong, nagapamatuod lang kini nga aduna gyu'y usa ka Kinabuhi diin dili ka na mahimong mamatay, tungod kay kining kinabuhia aduna man kini'y kamatayon. Kita n'yo? Apan usa ra kini ka landong, tungod kay buhi ka man, linalang nga nagalihok nga adunay abilidad sa pagtan-aw, paghunahuna, paglihok, ug pagsulti, ug may lima ka mga sensya sa lawas. Apan bisan pa man nasayod ikaw, nga ang mga niini, mamatay ra kini. Ug aduna kini og daghang problema. Kahibalo na mo, mamahimo lamang kining. . . Usa ra kini ka aninag, kita n'yo, nga adunay sinagol nga kinabuhi ug kamatayon.

20 Ngani kinahanglan nga mamatay ang pisikal. Apan kung imong ginareplektar, pinaagi sa imong mortal nga kinabuhi, ang Kahayag sa Langit, kung ingon-ana ginareplektar mo ang Kinabuhing Walay Katapusan, ang Dios. Dayon pag-mamatay ka, wala ka na'y uban pang paingnan gawas nianang Kahayag, tungod kay mao man Kana ang imong gireplektar.

21 Kung iya ka sa mangitngit nga kalibutan, ginareplektar mo kana, ug wala ka na'y, uban pa nga maadtoan kondili ngadto lamang sa kangitngit. Kita n'yo? Busa ania kita sa usa ka pag-aninag. Ug, makita nato kana. Ug sa ingon ka sigurado nga ginareplektar sa Balaang Espiritu ang Kahayag ug Kinabuhi, mao man usab sa kamatayon nga ginareplektar ang kangitngit.

22 Ug ania kining duruha. Pagkaug-. . . Sa katapusan niining semana, tingali karong Dominggo, atong padak-an ang maong gamay'ng retrato sa mas daku-daku nga sukod, aron nga maibutang kini sa paskinan.

²³ Diin, ginapakita usab ang *imong* retrato dinha sa paskinan. Wala ko kabalo kung inyo bang namatikdan kana, o wala. Ug dayon . . .

Ug mga usa na ka semana ang milabay, didto sa—sa Jamaica, kon diin ako nagabuhat og pang-misyon nga buluhaton . . . Nagapadala kami og mga teyp sa tibuok kalibutan. Ug nakaabot na *Ang Pito Ka Mga Selyo* ngadto sa . . . didto sa mga sudlonon nga bahin sa Jamaica, didto mismo sa mga sudlonon na nga bahin niini. Ug grabe gyud ka kinaraan didto, sa halayong bahin sa Blue Mountain. Ug ang mga lumad didto, usahay, aduna sila’y usa—usa ka teyp rekorder nga gihatag namo para kanila, nga kinahanglan pa nimong—nimong, sama sa karaan na nga Victrola, nga ginapatuyok pa, ug dayon ipatukar—ipatukar kini nga ingon niana. Dayon, sa matag pipila ka minuto, aduna na pud og magpatuyok niini.

²⁴ Kining maong pundok aduna lang sila og usa—usa ka gamay’ng baterya, unom-ka-boltahe nga baterya, o ingon niana, sa pagpatukar sa maong teyp rekorder. Ug sila—magkauban sila nga nagalingkod didto, nga sama sa kung unsa pud dinhi karong gabhiona, nagapaminaw niadtong *Mga Selyo*, nagtoo ko nga mao kadtö. Ug samtang nagahisgot ako, namatikdan nila, dunay misulod sa maong lawak, misulod kanang mao ra nga Haliging Kalayo, nagpaibabaw didto kon diin kadtong teyp rekorder ug mipahimutang sa ibabaw niadto. Dayon migawas sila ug mikuha og kamera ug gikudakan Kadto. Ug mismo Kadto, atua Kini, nga nagapaibabaw didto mismo. Busa padak-an nato kini, aron atong maibutang kini sa—sa paskinan dinha, para makita pud ninyo kini.

²⁵ Mapasalamaton kaayo kita tungod sa grasya sa Dios nga gidala kita . . . kita nganha sa Iyang Presensiya niining adlawa. Karon mapasalamaton kita tungod sa daghang mga butang.

²⁶ Karon siguro mangita ko dinhi ug tan-awon kung makakita ako og pipila, pipila ka mga nangalista na o pipila, nga ingon niana nga nahisgotan ko na. O, mokuha kita sa kung unsa nga matang sa usa—usa ka . . . Aduna ko’y pipila ka teksto nga naisulat na, bisan pa man, dinhi sa usa ka libro. Kung makakita man ako og usa, tingali’g hatagan ako sa Ginoo sa kung unsang butang nga igasulti bahin sa usa ka butang, samtang magampo kita.

Karon, nagahinam-hinam na gyud kita para karong Dominggo.

²⁷ Naghisgot na ako sa mga Mensahe. Ug, niadtong Dominggo, napalangan ko kamo og ayo dinhi, mahatungod sa, “Ngano ba nga nagatuaw ikaw Kanako? Isulti sa katawhan ug magpadayon.”

²⁸ Ug, karong Dominggo adunay panerbisyo sa pagpang-ayo diin igaampo ang mga masakiton. Karon, pagmoduol ka sa

mga masakiton, ug aduna gyu'y og unsa mang hinungdan nga ang mga masakiton, pag ginaampo nato sila, nga dili gihapon sila mangaayo. Ug buut ko, kon itugot sa Ginoo, usa lang ka hamubo nga wali sa Dominggo sa buntag, usab. Tungod nga, magpahigayon man ako og panerbisyo sa pagpang-ayo, ug igaampo ang tanang mga tawo. Ug si Billy Paul o ang pipila kanila moanhi dinhi karong Dominggo sa buntag, sa mga alas otso na, pag-ablihan na ang simbahan, aron manghatag og mga kard sa mga tawo inig sulod nila sa pultahan, o sa pag-abot dayon nila.

²⁹ Ug karon, kung ingon-ana, gusto kong paningkamotan, nagatoo ko nga naghatag kanako ang Ginoo sa unsa mang paagi og diyutay'ng panabut sa mga hinungdan kon nganong adunay pipila ka mga tawo nga dili gyud mangaayo. Ug ako—nagatoo ko nga tungod kini sa kakulang og pagsabut. Ug ako—sa hunahuna ko, tingali'g, hisgotan ra nato kana, sa Dominggo sa buntag, kon itugot sa Ginoo.

³⁰ Karon, usa lamang ka diyutay'ng panagtigum ang Miyerkules sa gabii nga panagtigum sa pag-ampo diin nagakatigum kita ug nagaampo, sama sa ginabuhat na nato, ug nagapakigtigum.

³¹ Usahay, ako—sa hunahuna ko nga ang usa sa grabeng mga butang nga nahibaloan ko niining panahona, mao ang kakulang sa pagkasinero bahin sa kung unsay ginatoohan nato. Kita n'yo? Kita n'yo? Kung ang Dios, sa mga adlaw ni John Wesley kaniadto, nagbuhat niadtong panahona sa kung unsay ginabuhat Niya sa karon, unsa kaha kung gibuhat usab kaniadto; sa mga adlaw ni Martin Luther, o unsa pa man? Sama sa atong nakita nga ginapamuhat Niya, nga parehong napamatud-an sa Iglesia, pinaagi sa Espiritu, ug pinaagi sa siyensiya, ug sa matag pagpamuhat, kini—kinahanglan nga mailhan ang paagi niini. Ug ginapahayag Kini sa Pulong sa Dios dinhi ug ginasulti Kini sa dili pa man Kini mahitabo. Ug dayon ginapamuhat, ug ginapropesiya, ug ginapakita ang mismong butang nga Iyang gikasulti. Mahitabo kini sa hingpit gayud, sa eksakto gayud kung unsay Iyang pagkasulti. Ug sa gihapon nagalingkod lang kita nga daw sa mga tapolan, nagakahibulong. “Bueno, nagapahinungod ba kaha kana kanako? Nagapahinungod lang ba kaha kana sa—sa iglesia, sa kinatibuk-an. O—o, apil ba gyud kaha ko Niini?” Siguro, sa Dominggo sa buntag, paningkamotan ko sa paghisgot ang pipila sa niana nga mga prinsipyo aron nga mahayagan kita og diyutay.

³² Karon, niining gabhiona, aduna ko'y nakaplagan, bag-o ko pa lang kining giablihan dinhi, sa wala pa ako mianhi dinhi. Naghunahuna ko, “Unsa kaha kung si Igsoong Neville, kung pag-adto ko didto, moingon kaha siya, ‘Tindog ka ug manulti,’ ug molingkod na lang siya?” Kita n'yo? Nahunahuna ko, “Mas maayo pa nga magsulat ko daan og pipila ka mga Kasulatan.”

Tungod kay, kabalo ko, nga siya, usa gayud siya ka hiligugmaon nga igsoon, ug atong—ginapasalamatan gyud nato siya.

³³ Sa dili pa kita mag-ampo alang sa Pulong, gusto kong himamaton ang usa—usa ka igsoong lalaki. Dili ko na matimanan ang iyang ngalan niining higayona, duha sila. Ania sila, nga mga higala ko. Mga . . . Sila’y mga ministro ug ebanghelistas, diha sa natad, sa pagpang-misyon. Nadungog nila kining mga Mensahe pinaagi sa teyp. Ug gikan sila sa nagkalainlaing denominasyonhong mga iglesia, duha ka batan-ong mga lalaki. Ug gani ang kining batan-ong lalaki, ang usa kanila interesado gyud kaayo, hangtud nga misakay kini sa eroplano, paingon sa Tucson, bag-ohay pa lang, didto sa usa ka patapos na nga panagtigum. Nagatoo ko nga atua ako niadto sa Business Men’s Breakfast. Ug ang maong batan-ong lalaki, usa ka buutan nga batan-ong lalaki, nakatambong siya didto. Ug siya’y . . .

³⁴ Sila’y mga taga-Kansas. Ug mianhi sila dinhi aron maikasal ko sila. Ginapasalamatan ko kana. Ang hunahunaon nga may mga tawong nagatoo sa imong mga pag-ampo, nga, nagatoo nga patalinghugan ug pagatubagon gayud sa Dios; mga batan-on nga nagasugod pa lang sa pagkinabuhi, nga sama niini. Ug sa pag-abot nila dinhi aron maikasal ko sila, kagahapon, nahibaloan nila nga gikinahanglan pa diay sa balaod sa estado sa Indiana, bisan nga nakapa-blood test na sila, kinahanglan pa silang mohulat dinhi niining estado, og tulo ka adlaw, ayha pa sila puedeng maikasal. Busa, dili pa sila puedeng maikasal hangtud sa Biyernes sa buntag.

³⁵ Ug hangyoon ko ang atong igsoong lalaki dinha sa tumoy, kung puede siya motindog ug isulti kanato kung si kinsa siya, ug ang hiligugmaon niyang pangasaw-onon, ug ang katapad nga igsoong lalaki usab.

³⁶ [Nagaingon ang maong igsoong lalaki, “Salamat, Igsoong Branham. Pribilihiyo gayud nga maania dinhi. Ug ako diay si Igsoong Roger O’Neil, nga nagapuyo sa Kansas, nagabiyaha ako sa natad pagpang-misyon, ingon nga usa ka ebanghelistas, nagapamahayag nga, ‘Nagaluwas si Jesus, nagaayo, pinaagi sa pagtoo kang Jesus. . .?’ Kanunay kong ginadala. . .? Kini ang akong pangasaw-onon, si Patricia Brown. Ikasal na kami, karong Biyernes. Kini ang akong kauban nga ebanghelistas ug kauban sa buluhaton, si Igsoong Ronnie Hunt, nga ania sa tumoy. Ug kini usab ang iyang pangasaw-onon, si Carol. . .? . . . Ug malipayon kami nga maania dinhi karong gabhiona.”—Ed.]

³⁷ Salamat, kaayo. Nagatinguha gayud kita para niining batan-ong mga pinadala, alang sa buluhaton ni Ginoong Jesus, og mga panalangin sa Dios, nga magmalampuson sila sa ilang panaw. Ug samtang nagapamalandong ako, nagahulat alang sa Pag-abot sa Ginoo, ug ang makita ang batan-ong mga kalalakenan ug batan-ong mga kababayen-an nga may katuyoan sa ilang

kasingkasing, nga alagaron si Cristo, nagapadasig kana kanako, kita n'yo, nga makita sila nga nagabarug nga ingon niana. Ang Ginoo magapanalangin kaninyo, sa madagayaon, igsoon kong lalaki, igsoong babaye.

³⁸ Karon ablihon nato diha sa diyutay'ng Basahon nga wala pa nako nahisgotan kaniadto, sa tibuok kong kinabuhi. Ug usa gayud kini . . . Usa lamang ka kapitulo, ang Libro ni Filemon. Ug usa kini ka . . .

³⁹ Medyo aduna gyud ko'y pagka-Irish, ug ako—ug aduna pud ko'y alambre sa ubos kong mga ngipon, nga nagapugong sa pipila ka ngipon sa luyo nga bahin. Mao nga, ako, usahay dili nako malitok sa husto ang ingon-niini nga mga ngalan, bisan kabalo man unta ko kung unsa ang mga niini. Ug usahay dili nako malitok sa husto ang mga niini, tungod pud sa kakulang og edukasyon. Busa, “Filemon,” diay ang ingon sa usa ka tawo dinha sa likod, nga sa hunahuna ko mao gayud ang hustong paglitok niini.

⁴⁰ Karon, sa ika-1 nga bersekulo, gusto kong mokuha og usa lang ka pulong o duha gikan niini.

Si Pablo, nga binilanggo ni Jesus Cristo, . . .

⁴¹ Ug mao kana'y gusto kong gamiton karong gabhiona, ingon nga usa ka teksto, kon itugot sa Ginoo, mao ang: *Usa Ka Binilanggo*.

⁴² Karon, halos dili n'yo mahunahuna si Pablo nga ginaisip ang kaugalingon niya nga usa ka binilanggo. Usa ka tawong gipanganak nga gawasnon, nga puno sa Balaang Espiritu, apan sa gihapon ginatawag niya ang iyang kaugalingon nga “usa ka binilanggo.”

⁴³ Ug karon atong nahibaloan, kaniadtong nagapahinungod siya sa mga Taga-Corinto, “Si Pablo, nga apostoles ni Jesus Cristo.” Sa usa na usab ka higayon, “Si Pablo, nga apostoles ni Jesus Cristo pinaagi sa kabubut-on sa Dios,” kaniadtong nagapakigsulti siya kang Timoteo, ug sa nagkalainlaing uban pa. Karon sa dihang misulat siya dinhi kang Filemon, ingon niya, “Si Pablo, nga binilanggo ni Jesus Cristo.” “Si Pablo, ingon nga usa ka apostoles,” gusto kong magwali og usa ka gabii mahitungod niini. “Si Pablo, nga usa—usa ka ulipon,” magwali pud mahatungod niana. Ug pagkahuman, “Si Pablo, nga usa ka binilanggo.”

⁴⁴ Apan, karong gabhiona, ingon nga magkinahanglan kini og daghang mga oras aron tun-an bisan ang usa lang sa niining mga hilisgotanan, gusto kong hisgotan, niining gabhiona, “Si Pablo, nga binilanggo,” ug hisgotan ang hilisgotanan nga: *Usa Ka Binilanggo*.

Karon iduko nato ang atong mga ulo sa makadiyut.

45 Ginoong Jesus, ang si kinsa man nga tawo, nga may kasarang sa pisikal, makahimo gayud sa pagpakli sa mga panid niining Biblia, apan ang Balaang Espiritu lamang ang makahimo sa paghubad Niini diha sa kahayag nga ginapahinungdan niini. Ginahangyo namo Siya nga moanhi karon ug tabangan kami nga makasabot kung unsa kining, gipahinungod, niining bantugan, gamhanan nga propetang, si Pablo, ug bisan pa niana ginatawag ang kaugalingon niyang “usa ka binilanggo.” Hinaut nga igapadayag kini sa Balaang Espiritu nganhi kanamo samtang magahulat kami Kaniya, sa Ngalan ni Jesus Cristo. Amen.

46 Karon mahanduraw ko, si Pablo, sa dihang ginasulat niya kini nga sulat ngadto kang Filemon, nagalingkod siya sulod sa bilanggoan, didto sa bilanggoan niadtong siyudara, nga usa—usa—usa ka binilanggo. Ug nasayod gyud siya, tungod sa iyang katungdanan kung unsa gyu’y pasabot sa maong pulong. Napalibotan siya og—og—og mga rehas. Siya—makagawas lang siya pag adunay tawong magpahigawas kaniya. Ug nasayod siya kung unsa’y mamahimong susama sa usa ka binilanggo. Ug dayon, usab, nagatoo ko nga ang—ang maong apostoles aduna siya’y diyutay’ng buot ipasabot...dili nga ginapahinungod lang niya kini sa iyang kasamtangang kahimtang, ingon nga binilanggo ang iyang—iyang pisikal nga lawas nga nagalingkod siya sulod niana—niana nga bilanggoan. Kondili nagatoo ko nga ginapahinungod niya ang iyang—iyang pagkabiniilanggo, sa iyang—iyang—iyang espiritu, iyang kabubut-on, ingon nga binilanggo ni Jesus Cristo.

47 Karon, gipakatawo kitang tanan, nga may gawasnong kinaugalingong pagbulut-an, aron mohimo og unsa mang desisyon nga gusto nato. Makatarunganong gibuhat sa Dios kana. Tungod nga, kinahanglan man Niyang ipahimutang ang matag tawo sa mao rang paagi, o kay kondili gipahimutang Niya unta ang sayup nga tawo sa...gipahimutang Niya unta ang unang tawo sa sayup nga paagi, nga gihatagan Niya kini og gawasnong kinaugalingong kabubut-on. Kita n’yo? Eksaktong sama gayud kita, karong gabhiona, ni Adan ug ni Eva. Walay kalahian. Ang husto ug ang sayup gipahimutang usab diha sa atubangan sa matag usa kanato. Kinabuhi ug kamatayon, makahimo kita sa pagpili; anaa ra kanimo, ang pagpili. Kita n’yo?

48 Ingon niana usab ang gibuhat ni Adan ug Eva kaniadto, ug, kita n’yo, ug—ug gihimo nila ang sayup nga pagpili. Ug karon, tungod niana, gipahimutang hinoon nila ang tibuk kalawatan, ang kalawatan sa tawo, ilalum sa kamatayon, sa silot nga kamatayon.

49 Ug busa mikanaug ang Dios sa porma nga tawo ug giangkong kana nga kamatayon, ug gibayran ang silot nga kamatayon, aron ang...Iyang mga sakup nga naninguha nga—nga makalingkawas mamahimong gawasnong.

⁵⁰ Karon, kung giluwás Niya kita, nga dili sa sama rang paagi nga gibuhát Niya kaniadto kang Adan ug Eva, ug gipalingkawás lang kita pinaagi sa kung unsang butang, miingon, “Luwason Ko kamo bisan kung gusto pa ninyong maluwas o dili,” kung ingon-ana gipahimutang Niya diay si Adan ug Eva sa—sa sayup nga paagi, nakita n’yo. Apan ang matag usa kanato gikinahanglan gayud nga mamili, niining panahona, tali sa kamatayon ug kinabuhi. Mamili gyud kita.

⁵¹ Ingon nga bag-oháy ko lang gisulti, kung nagapamatuod ang imong kahayang, ang imong kinabuhi usab eksaktong nagapamatuod kung asa ka nagadapig. Dili ko igsapayan kung unsa man nga bahin ang ginaingon mo nga imong ginadapigan. Ang ginabuhát mo, sa matag adlaw, nagapamatuod kana kung unsa ikaw. Nadungog na ninyo ang karaang panultihon, “Makusog kaayong nagapamahayang ang imong kinabuhi, dili ko na madungog ang imong testimonyo.” Kita n’yo? Imong—makusog kaayo nga nagasulti ang imong mga gawi.

⁵² Dugay na akong nagatoo sa mga pagsiyagit ug paglukso-lukso. Apan kanunay ko pud ginaingon, “Ayaw kamo paglukso nga lagpas pa kay sa inyong pagkinabuhi, tungod kay pagatan-awon kana sa kalibutan.” Nakita n’yo? Kinahanglan nga molukso ka lang nga ingon ka habog sa imong pagkinabuhi, tungod, adunay nagatan-aw kanimo. Ug karon pag. . .

⁵³ Adunay mga tawo nga dili na nagapanimba. Sila—sila, daghan kanila, ang dili na mosimba. Ug ang pipila kanila, nga wala na nagasimba, sila’y mga matinuurong tawo. Nakita nila ang grabe nga pagkadautan sulod sa iglesia, hangtud nga ayaw na nilang magkaaduna og unsa man nga kahilambigitan niini. Ug sa makadaghang higayon, nagahisgot kita bahin niini nga walay lipodlipod, gani dili mo sila mabasol, kita n’yo, tungod sa—sa paagi nga manggawi ang mga tawo. Ginatawag nila ang ilang mga kaugalingon nga Cristohanon kono. Apan sila ang pinakadakung kapandolan nga nagkaaduna ang kalibutan, mga kalalaken-an ug kababayen-an nga nagapamahayang nga mga Cristohanon kono, apan nagakinabuhi diay nga lahi sa kung unsay ilang ginapamahayang. Husto gayud.

⁵⁴ Karon, magaabot ang mga pagkapalaw didto na sa Paghukom. Karon, ang makasasala, ang tigpayuhot og bino, ang sugarol, ang mananapaw, siya—dili na siya mapalaw nga madungog ang pagbasa sa iyang silot, “Pahawa og paadto ka sa kalayo nga walay katapusan.” Dili na siya mapalaw. Apan kanang tawo nga nagapaningkamot sa pagtago sa iyang kaugalingon luyo sa kung unsang matang sa pang-iglesiang pagpamahayang, mao kana ang tawo nga mapalaw didto sa Adlaw sa Paghukom. Kita n’yo? Kanang nagapamahayang nga usa kono ka Cristohanon, ug nagakinabuhi diay nga lahi. Mas maayo pang wala na lang siya mihimo og unsa man nga matang sa pagpahayang, sa sugod pa lang, kay sa nga mosugod pa ug

magkinabuhi nga lahi. Tungod kay, siya mao ang pinakadakung kapandolan nga aduna kita, kanang maong tigpahayag nga nagaingon nga siya—siya—siya’y usa kono ka Cristohanon, ug nagakinabuhi diay nga lahi.

⁵⁵ Sa kanunay, ayaw paghukom sa inyong kinabuhi tungod sa kung unsa kadaghang gahum nga aduna kamo nga makapamuhat og mga milagro. Ug dili usab nato pagahukman ang atong kaugalingon tungod sa kung unsa kadaghan nga kahibalo nga aduna kita bahin sa Pulong. Apan sa kanunay hukmi ninyo ang inyong kaugalingon, pagpamalandong ug imbentaryoha kung unsa nga matang sa bunga ang ginapamunga sa kinabuhi nga kasamtangang gikinabuhi mo karon. Kita n’yoy?

⁵⁶ Sama sa giwali ko kaniadto, didto sa businessmen’s meeting sa Phoenix, Arizona, mahatungod sa aninag nga iya ni Jesus, nga nagareplektar og Kinabuhing Cristohanon. Gisugilon ko nga natawo ako dinhi dapit sa Kentucky, nga grabe kaayo ka karaan, ilabina kaniadtong bata pa ako. Ug kining gamay’ng batang lalaki wala siya’y usa—usa—usa—usa ka balay nga sama sa aduna kita dinhi, kon diin aduna kita og daghan kaayong maanyag nga mga dalagita nga kinahanglan nilang manamin sa mga salamin, nga aduna sila sa tibuok balay, aron mapabilin nga hapsay ang ilang buhok, ug uban pa. Apan kining batang lalaki aduna siya’y usa ra ka gamay’ng salamin, usa ra ka buak nga salamin nga gisab-it sa usa ka kahoy sa gawas, kon diin didto usab kadtong labhanan, nga didto nagalaba ang iyang inahan ug amahan, ug nagapanudlay sa ilang buhok, ug uban pa, gamit kining usa ka gamay ra nga buak na nga karaang salamin nga gisab-it sa kahoy.

⁵⁷ Sa tinuod lang, ingon niana nga matang sa balay ang aduna kami kaniadto. Pag-adunay gustong manamin, kami nga mga bata pa, kinahanglan pa namong mokuha og kahon ug motungtong sa labhanan, ug manamin niining buak na nga—nga salamin nga napunit ra nako, mismo, sa basurahan. Dili diay didto sa Kentucky. Dinhi diay kana sa Indiana, dinhi dapit sa Utica Pike.

⁵⁸ Karon, ang kining gamay’ng bata wala pa gayud niya nakita ang iyang kaugalingon nga sama niana. Busa, pag-adto niya sa siyudad, aron mobisita sa iyang lola. Ug didto sa... Sa nagalakaw-lakaw na siya sulod sa lawak, ang lola niya adunay balay sa pultahan niini adunay salamin nga sagad ang gidak-on. Ug busa, ang gamay’ng batang lalaki, nga nagadagan-dagan didto sa—sa lawak, nakakita og usa pa ka gamay’ng batang lalaki sa atubangan niya. Ug kining gamay’ng batang lalaki nagadagan-dagan, usab. Busa nahunahunaan niya nga mohunong sa siya sa pipila ka minuto ug tan-awon kung unsa’y pagabuhaton sa niining gamay’ng batang lalaki. Ug sa paghunong na niya, mihunong usab ang gamay’ng batang lalaki. Sa dihang milingi siya, milingi usab ang gamay’ng batang lalaki.

Gikalot niya ang iyang ulo, gikalot usab sa gamay'ng batang lalaki ang ulo niini. Sa katapusan, mipaduol-duol siya, aron susihon. Ug milingi siya. Ug ginatan-aw diay siya sa iyang inahan, ug sa iyang lola usab, nga natingala. Miingon, "Aba, mama, ako kana."

⁵⁹ Mao nga miingon ko, nga, "Kita, usab, nagareplektar kita og usa ka butang." Kita n'yo? Nagareplektar ang atong kinabuhi.

⁶⁰ Ug karon, kung nabuhi kita sa mga adlaw ni Noe kaniadto, kinsa kaha'y atong gipili nga dapigan? Unsa kaha'y atong gipili nga dapigan sa kaniadtong dakung adlaw nga gikinabuhian ni Noe? Unsa kaha'y atong gipili nga dapigan sa mga adlaw ni Moises? Unsa kaha'y atong gipili nga dapigan sa mga adlaw ni Elias, nga propeta, sa dihang nalukop na ang tibuok kalibutan sa—sa ka dakung tipun-og sa—sa pagka-moderno, sama sa modernong si Jezabel, nga nagdala sa tanang mga alagad sa Ginoo ngadto sa pagka-kalibutanon? Ug nanagyukbo na ang iglesia ug ang mga sacerdote ngadto kaniya. Midapig kaha kamo sa gidapigan sa kadaghanan, o midapig kaha kamo kang Elias?

⁶¹ Karon, sa mga adlaw usab ni Ginoong Jesus kaniadto, paghunahunaon nato kining dili-inila nga Tawo, nga walay edukasyon nga iya sa kalibutan, walay mga tulonghaan nga makaplagan nilang Iyang gieskwelahan, ug wala—walay pang-seminaryo nga kasinatian. Ug—ug nagdaku pa gyud nga gibansagan og "gipanganak nga ilehitimo." Ug dayon miadto didto, nga nagawali og usa ka Ebanghelyo nga sukwahi sa unsa mang gikatudlo kanila. Grabe. . . Ug ginakondena pa ang mga ministro ug ang ilang mga organisasyon, ug uban pa.

⁶² Mao nga mihimo ang mga organisasyon og usa—usa—usa ka pahayag, "Kung aduna ma'y moadto aron sa pagpaminaw niining gitawag kono nga propeta, palagputon gikan sa sinagoga," nga usa—usa ka mortal nga sala kaniadto. Kinahanglan nga maapil gyud sila. Ang paagi lamang nga makasimba sila mao'y pinaagi sa dugo sa cordero. Kinahanglan silang motambong alang niining paghalad. Ug—ug gani mamahimo pa gyud silang sinalikway, ug mao nga bug-at kaayo kini nga butang.

⁶³ Ug kini nga Tawo walay pagtagad alang niana. Ug bisan pa niana hingpit Siya ka-eksakto sa Kasulatan, apan dili sa paagi nga ilang nahibaloan Kini. Unsa kaha'y inyong gipili nga dapigan? Kita n'yo? Karon, dili. . . Ang kinabuhi nga imong gikinabuhi karon, eksaktong nagareplektar kung unsa gayud ang pagabuhaton mo niadtong tungora, tungod kay aduna man kanimog ang mao ra nga espiritu. Kita n'yo? Kung ginadapigan n'yo kana karon, kauban nila, siguradong inyo kanang gibuhat kaniadto. Tungod kay, ang mao rang espiritu nga anaa kaninyo karon atua man usab sa maong mga tawo kaniadto. Kita n'yo?

64 Dili ginakuha sa yawa ang iyang espiritu; basta mohawa lang siya gikan sa usa ka tawo aron mobalhin ngadto na pud sa uban.

65 Dili ginakuha sa Dios ang Iyang Espiritu, usab; nagabalhin lang Kini gikan sa usa ngadto na pud sa usa pa. Kita n'yo?

66 Busa, ang mismong Espiritu nga atua ni Elias kaniadto mibalhin ngadto kang Eliseo, mao ra sa gihapon kini nga Espiritu ang atua kang Juan Bautista, ug sa uban pa.

67 Ang Balaang Espiritu, nga atua kang Cristo, mianha usab ngadto sa mga tinun-an, sa mga nagsunod pa, ug nagakunsad sa gihapon nganha sa mga tawo. Nakita n'yo? Wala gayud ginakuha sa Dios ang Iyang Espiritu.

Busa ania kita nga, gikinahanglan magpili.

68 Ug ako—dili ko makita dinhi diin nagabasol si Pablo sa kung unsa man, ug nagaingon nga nagbasol siya ingon nga usa ka binilanggo. Apan ginapahinungod niya ang iyang kaugalingon. . . Nagatoo ko nga si Pablo, samtang gisulat niya kini nga sulat gamit ang maong pang-sulat, nga ang Balaang Espiritu kadto ang nagpahimo kaniya nga isulat kini. Aron, tingali, bisan niining gabhiona, nga mahimo natong makuha ang kahulogan sa atong teksto, aron maipakita kon nganong gibuhat ni Pablo ang ingon-niini. Tungod kay, kini uyon man sa Kasulatan, ug Eternal ang Kasulatan. Nagatoo ko, nga, samtang nagalingkod siya sulod niadtong karaang mangitngit nga bilangoan, nagsulat si Pablo ngadto sa iyang kauban niini, nga, sa iyang igsoon, nga siya'y "usa ka binilanggo ni Jesus Cristo." Aron, iyang maipahayag kini sumala sa iyang nakita kung unsay nakapalibot kaniya. Karon, atua siya sulod sa bilangoan, apan dili kadto mao'y iyang gihisgotan sa, niining—niining alagad ni Cristo, nga usa ka ministro nga kauban niya. Nagahisgot siya nga siya'y usa ka binilanggo ngadto sa Pulong ni Jesus Cristo, tungod kay si Cristo mao ang Pulong.

69 Ug usa ka bantugang eskolar si Pablo sa iyang adlaw kaniadto. Aduna siya'y dakung ambisyon. Siya'y usa—siya'y usa—usa—usa ka tawo nga binansay, sa tawo, sa tawong ginganlan og Gamaliel, nga usa ka bantugang magtutudlo sa iyang adlaw kaniadto, usa sa pinakabantugang mga tulonghaan nga mahimo niyang eskwelahan. Pananglitan, sama sa ginaingon nato, Wheaton, o Bob Jones, o pipila sa bantugang pundamental nga tulonghaan. Gikatudloan siya ingon—ingon—ingon nga usa ka ministro sa Pulong. Ug siya'y edukado gayud, ug maantigo, ug usa ka maalamon nga batan-ong lalaki nga may dakung ambisyon nga sa umaabot nga adlaw mamahimong usa ka sacerdote o labaw'ng sacerdote ngadto sa iyang katawhan.

70 Aduna siya'y ambisyon. Ug dayon ang mahibaloan, nga, tungod niining dakung ambisyon gibansay siya, ug gigahin ang tibuk niyang kinabuhi, tingali'g gikan pa sa panuigon nga mga walo o napulo ka tuig, hangtud sa mga traynta o traynta'y-

singko, sa dihang natapos niya ang kolehiyo ug migraduwar; ug nakaangkon siya sa tanan niyang mga diploma ug tanan na, ug maayo ang dungog atubangan sa tanang mga—mga ministro, bisan sa labaw'ng sacerdote sa Jerusalem. Aduna siya'y mga sugo gikan kaniya, personal nga mga sugo, nga gisulat, ug gipiyalan kining bantugang si Saulo, “Nga moadto didto sa Damascus ug pangitaon ang tanan niadtong mga nanagsimba sa Dios nga sukwahi sa kung unsay gisulti niya, ug gapuson sila ug ipabilanggo sila.” Kung gikinahanglan, aduna pa gani siya'y sugo nga ipapatay sila, kung gustohon niya. Siya'y... Aduna siya'y dakung ambisyon.

⁷¹ Ug karon, ang tanan niadtong pagbansay kaniya, gikinahanglan kadtong tangtangon sa Dios gikan kaniya. Kita n'yo? Ug unsa man kaniadto ang iyang mga tinguha, ug ang mga gigastohan og salapi sa iyang amahan, ug ang mga ambisyon sa iyang amahan ug inahan, gitangtang kadtong tanan gikan kaniya tungod nga—nga ang Dios aduna ma'y ubang plano. Busa, usa siya ka binilanggo una sa iyang tinguha nga aduna siya sa iyang kinabuhi, ug dayon nahimo siyang usa ka binilanggo ni Jesus Cristo, Kinsa mao ang Pulong.

⁷² Kadtong dalan paingon sa Damascus ang nagpausab kang Pablo. Sa pagpadulong niya didto, nga mga alas onse na, tingali, niadtong adlaw, dunay miigo kaniya nga nahulog siya. Ug nadungog niya ang usa ka Tingog, nga nagaingon, “Saulo, nganong ginalutos mo Ako?” Ug mihangad siya. Ug sa paghangad niya, ingon nga usa ka Judeo, ug nahibalo nga kadtong Haligi nga Kalayo mao ang Ginoo nga nanguna sa mga anak sa Israel kaniadto, tungod kay nasayod siya nga ingon niana gyud Kadto.

⁷³ Hinumdumi, nga kining maong Hebreohanon wala unta niya gitawag ang bisan unsa man ingon nga “Ginoo,” dakung G-i-n-o-o, Elohim, kung dili siya kumbinsido nga ingon niana gyud Kadto, tungod kay usa man siya ka binansay nga eskolar. Ug sa paghangad niya, ug nakita niya Kining, usa ka Kahayag, nga Haliging Kalayo nga mao'y nanguna kaniadto sa iyang katawhan latas sa kamingawan, ug mao nga miingon siya, “Ginoo,” Elohim, dakung G-i-n-... “Ginoo, Kinsa Ka man?”

⁷⁴ Ug siguradong nakurat gyud og ayo kining teologo, nga giingnan siya, “Ako mao si Jesus,” ang mao Mismong ginabatokan niya. Grabe—grabe kaayong pagkausab! Oh! Oh! Siguradong nakapakurat gyud kaayo kadto niining tawhana, nga ang tibuok niyang ambisyon, nga mahinagbo, sa kalit lang, nasayran niyang iya diay ginalutos. Ang iyang mga ambisyon mao'y naghatud kaniya nga—nga mapahilayo gikan sa pinaka-importanteng butang nga angay unta niyang pagabuhaton. Ug siguradong usa—usa gyud kadto ka dakung nakapakurat, alang niining apostoles, sa dihang miingon Kadto, “Ako mao si Jesus,”

nga mao ang Mismong ginalutos niya. “Nganong ginalutos mo Ako?”

⁷⁵ Usa pa ka diyutay’ng kinutlo ang mahimo natong hisgotan dinhi. Nakita n’yo, samtang ginabiaybiayan nila ang Iglesia, sa tinuod lang wala nila ginabiaybiayan ang Iglesia, kondili ginabiaybiayan nila si Jesus. “Nganong ginalutos mo Ako?” Unsaon man ni Pablo kaniadto, tungod sa tanan niyang kahibalo, unsaon man niya sa pag-too nga Kini mao’y... nga kining Pundok nga iyang ginalutos mao diay ang mismong Dios nga iyang giangkong nga ginaalagaran? Sa hunahuna ko nga, bisan dili na kita mohisgot sa mga detalye niana, nagtoo ko nga binansay na kita og maayo nga mahibaloan kung unsay buot kong ipasabot dinhi. Ang mao rang butang nagakahitabo sa gihapon karon.

⁷⁶ Si Pablo, tungod sa kawalay-himbangkaagan, apan bisan pa niana maalamon ug utokan, labi pang utokan kay sa niadtong mga taga-Galilea nga iyang ginalutos, nga tungod kono sa ilang pagkakabus gidawat nila kining Tawo ingon nga Ginoo. Apan, si Pablo, sa iyang grabeng mga natun-an ug sa iyang mga kahibalo, dili siya makadawat Niana. Ug daw sa unsa kadto ka kalit nga pagkausab para kaniya, didto sa dalan. Ug gibutahan siya, aron nga dili niya matuman ang iyang tahas, ug gidala siya ngadto sa usa ka dapit sa dalan nga gitawag og Matul-id, ug sa balay sa usa ka tawo.

⁷⁷ Ug dayon dunay miabot nga propeta didto, nga ginganlan og Ananias, nga nakakita na sa panan-awon, kaniya nga nagapadulong didto, nakakita na kung asa man siya, giadtoan siya didto, ug misulod. Ug miingon, “Igsoong Saulo, ang Ginoo nga nagpakita kanimo didto sa dalan; mao’y nagsugo kanako, aron nga maipandong ko ang akong mga kamot nganha kanimo, ug aron makakita ka na ug mapuno sa Espiritu Santo.”

⁷⁸ Kita n’yo na kung asa siya. Siguradong—siguradong grabe kaayo kadto nga butang para kang Pablo! Kita n’yo? Ang tanang gibansay niya nga pagabuhaton bali diay. Busa karon, ang—ang tanang edukasyon nga nabatongan niya, kadto—nahimo na lang kadtong walay pulos kaniya.

⁷⁹ Karon, nasayod kaayo siya nga aduna siya’y kasinatian. Busa ania ang usa pa ka maayo nga leksyon para kanato, nga, dili gyud igo ang kasinatian lang. Kinahanglan nga kasinatian kini nga uyon sa Pulong sa Ginoo. Busa, pagkakita niya niini ug nasayran niya nga usa Kini ka halangdong Butang, ug, aduna na’y uban nga midawat Niini nga nag-una pa kaniya, migahin siya og tulo ka tuig ug unom ka bulan didto sa—sa disyerto sa Arabia; gidala ang—ang Biblia, sama sa kung unsa Kini kaniadto, ang Daang Tugon, ug miadto siya didto, aron—aron itandi kining kasinatian nga iyang nabatongan, ug hibaloan kung uyon ba Kini sa Kasulatan.

⁸⁰ Karon unsa kaha kung miingon siya, “Buena, siguro usa lang man kana ka diyutay’ng butang nga molabay ra,” ug mipadayon lang siya? “Sundon ko ang akong kahibalo”?

⁸¹ Karon, kinahanglan niyang mahimong binilanggo sa usa ka butang, usa ka binilanggo. Busa pagkahuman nga gitandi niya kadto, ug nakita niya, dili ikatingala nga nasulat niya ang Basahon sa Mga Hebreohanon, nga iyang gitipo. Kita n’yo? Tulo ka tuig ug tunga nga atua siya didto, nga nagpahiluna diha sa Pulong, ug nahibaloan niya nga ang mismong Dios nga nagtawag kaniya ginadala siya pabalik, ug giusab ang tanan niyang mga kahibalo, giusab ang tanan niyang sukad pa kaniadtong mga panahum, ang tanan niyang mga pagbansay. Ang tanan niyang mga ambisyon, giwagtang gyud kadto gikan kaniya, ug nahimo siyang usa ka binilanggo. Pagkadaku kaayo sa gugma sa Dios, ug usa—usa kadto ka kapadayagan, nga dili na niya mahimong mopahilayo pa gikan Niini.

⁸² Ingon niana ang tinuod nga kasinatian sa matag matuod nga magtotoo nga nakapakigttagbo sa Dios. Imong—imong natagbo ang usa ka Butang nga pagkahalangdon kaayo, nga ikaw... nga—nga mao’y nakapahimo kanimo nga usa—usa ka binilanggo, sa tanang uban pa. Kita n’yo? Imong—imong gipahilayoan ang tanang butang, aron ipabilanggo mo ang imong kaugalingon ngadto Niini.

⁸³ Gipahayag na kini usa ka higayon kaniadto diin miingon si Jesus, “Ang Ginghamlan sa Dios susama ra sa usa ka tawo nga nagapamalit og mga mutya. Dayon pagmakaplagaan na niya kanang pagkahimiling Mutya, ibaligya niya ang tanan nga aduna siya, aron lang nga maangkon kanang Usa.”

⁸⁴ Ug ingon niana usab dinhi. Ikaw—aduna ka’y intelektuwal nga mga idiya, aduna ka’y usa—usa—usa—usa ka pang-teologo nga kasinatian; apan pagmodangat ka na sa punto nga imong—imong—nakaplagaan mo na gyud ang tinuod nga Butang, imong—basta mo na lang ibaligya ang tanang uban pang butang, ug ipabilanggo mo ang imong kaugalingon ngadto Niini.

⁸⁵ Nasayod si Pablo kung unsa kadto. Iyang—nahibaloan niya nga nahiktan siya ngadto sa usa ka Butang. Sama ra nga butangan nato ang usa—usa—usa ka kabayo ug yugo, aron—aron sa pagbitad og usa ka butang. Ug nasayod si Pablo, pagkahuman niadtong kasinatian, ug sulod sa tulo ka tuig ug tunga nga ginatipo ang—ang maong kasinatian nga nabatonan niya, diha sa Biblia, naamgo niya nga gipili siya sa Dios ug gigapos siya sa Balaang Espiritu, og sa kasinatian nga nabatonan niya, aron dalhon ang Ebanghelyo ngadto sa mga Gentil. Ang Espiritu, Mismo, mao’y nagbutang og yugo kaniya.

⁸⁶ Ug, karong panahona, ingon nga mga alagad ni Cristo, mga nayugohan usab kita, og mga nahiktan na. Dili na kita makaikyap sa. Nahiktan na kita Niini, nahikot na ngadto sa

Pulong. Bisan unsa pa ang ginaingon ni kinsa man, nahikot ka na gyud ngadto Niini. Aduna gyu'y butang Niini, nga ayaw mo na gayud mopahilayo pa gikan Niini. Nabutangan ka na og yugo Niini, pinaagi sa Espiritu Santo, nasangon ka ngadto sa Pulong. Bisan unsa pa ang ginaingon ni kinsa man, Pulong gyud Kini. Nahiktan na ngadto Niini, nasangon na ngadto Niini. Ngadto sa Pulong, pinaagi sa Espiritu, nahiktan gyud siya.

⁸⁷ Nakat-onan niya sa—sa luyong bahin didto sa disyerto sa Arabia. Nga, ang tanan niyang mga butang kaniadto, ug mga kasinatian, ug ambisyon, nga, gipanghukas na gikan kaniya ang ingon nianang mga butang.

⁸⁸ Karon, dinha nato masayran, karon, nga kinahanglan pud natong mahuboan, una. Ug ayaw sa mga tawo nga mahuboan. Gusto sa igsoon nga Methodist nga manghawid pa og diyutay sa iyang pang-Methodist nga pagtulon-an. Uh-huh. Gusto sa igsoon nga Baptist nga manghawid pa og diyutay sa iyang pang-Baptist nga pagtulon-an. Kita n'yo? Apan kinahanglan gyud nga bug-os kamong mahuboan sa tanang butang, ug matawo gyud, pag-usab. Ug dinha ka puedeng magsugod, tugotan nga manguna ang Balaang Espiritu. Dili mo puedeng ingnon, “Bueno, karon, akong—miingon ang akong amahan, nga sa pagsulod kono niya, pagsulod niya sa simbahan, nakiglamano lang siya sa pastor. Mao nga, usa na siya ka maayo ug maunongon nga miyembro.” Siguro okey pa man kana sa iyang henerasyon kaniadto, apan ania na kita sa usa na usa ka henerasyon. Kita n'yo? Karon kinahanglan natong mobalik ngadto sa mga panahon sa Biblia alang niining panahona.

⁸⁹ Ang mga sacerdote napanghiktan usab, kaniadto. Apan, nakita n'yo, miabot na sila ngadto sa usa na usa ka dispensasyon, ug sila—nangapakyas sila sa paghukas sa ilang daan na nga yugo ug aron sul-obon ang bag-o nga yugo.

⁹⁰ Ug mao gihapong butang ang makaplapan nato sa karon. Nakalabang na kita sa denominasyonhong kapanahonan, sama sa napamatud-an nato sa mga kapanahonan sa iglesia, sa Biblia, ug uban pa, apan nahiabot na kita karon sa usa ka gawasnong kapanahonan, diin nagakunsad ang Balaang Espiritu ug ginapanghimatud-an ang Iyang Kaugalingon, ug ginapaila ang Iyang Kaugalingon, ginahimo ang matag saad nga Iyang gisaad, nga mamatuman. Oh, grabe! Pagkaanindot nga panahon!

⁹¹ Ug hingsayran niya, ang usa pa ka butang, hingsayran niya nga dili na siya basta-basta na lang moadto sa mga lugar. Ingon nga, nahiktan na ngadto Niini, nga dili na siya. . . ug siya, sa gihapon gusto—gusto niya untang moadto. Nasayod siya nga ang tinguha niya'y makauban ang mga kaigsoonan kon diin siya ginadapit nga motambong, ug bisan pa niana gipugos siya sa

Espiritu sa pagbuhat og uban pang butang. Dili na iya ang iyang pagbulot-an.

⁹² Tingali'g adunay tawong moingon, “Igsoong Saulo, Igsoong Pablo, gusto namo nga moanhi ka dinhi, tungod kami ang may pinakadakung simbahan. Kami ang may pinakadakung kongregasyon. Siguradong daku gyud ang imong offering, ug uban pa.”

⁹³ Apan ingon nga naaghat sa Espiritu, naghunahuna pa naman siya, “Aduna ko’y igsoon didto. Gusto kong moadto ug maluwas kana nga igsoon, madala unta siya sa Ginoo.” Apan, bisan pa niana, giaghat siya sa Espiritu nga moadto sa laing dapit. Usa gayud siya ka binilanggo. Husto.

⁹⁴ Oh Dios, himoa kaming mga binilanggo nga sama niana, gikan sa kaugalingon namong mahakogon nga mga ambisyon, ug gikan sa kaugalingon namong mga pagdesisyon ug gikan sa among mas maayo nga ideya, aron mamahimong mga binilanggo ni Jesus Cristo. Sa hunahuna ko usa kini ka halangdon nga pahayag, nga, “Usa ako ka binilanggo ni Jesus Cristo.”

⁹⁵ Ug hinumdumi, Siya mao ang Pulong. Kita n’yo? Bisan unsa pa ang hunahunaon ni kinsa man, ang Pulong ang mahinungdanon. Kita n’yo? Kung usa ikaw ka binilanggo sa Pulong, walay denominasyon ang makapasimang kanimo gikan Niini. Kini—kini mao ang Pulong. Ikaw gayu’y . . . Usa ikaw ka binilanggo Niini, kana lang. Kinahanglan manglihok ka sa sama rang paagi nga nagapanglihok Kini.

⁹⁶ Karon, dili siya makaadto sa mga lugar nga gusto niyang adtoan, tungod kay (ngano man?) gidid-an siya sa Espiritu. Mahinumduman ninyo, sa makadaghang higayon, nga nagsulay si Pablo nga moadto sa kung asang lugar, nga nagahunahuna, “Dinha ako makapahigayon og usa ka dakung panagtigum,” apan gidid-an siya sa Espiritu. Karon, klaro ba nga nagapahayag ug nagapamatuod kana nga si Pablo usa gyud ka binilanggo? [Nagaingon ang kongregasyon, “Amen.”—Ed.] Usa ka binilanggo ni Jesus Cristo, nahiktan ngadto sa Iyang Pulong, pinaagi sa Espiritu! Oh! Gusto ko kana. Uh-huh.

⁹⁷ Nagapus siya. Nagapus siya sa mga kadena, ug naposasan sa gugma, aron buhaton ang kabubut-on sa Dios, ug kana lang. Usa siya ka binilanggo. Naposasan siya sa gugma. Nagpasangon siya uban ni Cristo. Dili siya puedeng magyugo uban sa bisan unsa man. Nagpasangon na siya uban Kaniya. Ug kung asa man nagasubay ang Magtutultol, dinha pud siya kinahanglan mosubay. Bisan unsa pa ka lunhaw ang sibsibanan, dinhi *niining* dapita o *nianang* dapita, kinahanglan gyud niyang mosubay sa dalan nga ginasubay sa Magtutultol ug sa yugo.

⁹⁸ Oh, karong gabhiona, kung kita, ingon nga mga taga-dinhi sa Branham Tabernacle, mamahimo lang unta nga mga binilanggo; palayo sa kaugalingon natong mahakogon nga

pagkatawo, sa kaugalingon natong mga ambisyon, aron nga bug-os natong masurender ang atong kaugalingon ug magpasangon diha Kaniya, bisan unsa pa'y hunahunaon sa tanan nga tawo sa kalibutan, unsa pa'y buhaton sa tanang tawo sa kalibutan. Nagapus na kita sa mga kadena sa gugma. Mga binilanggo kita. “Nasangon na gyud og ayo ang akong mga tiil diha kang Cristo, hangtud nga dili na gusto niini mosayaw. Ang akong mga mata nasangon na kaayo diha kang Cristo, hangtud nga ako, pagmakita ko kining mga modernong paghubohubo diha sa kadalanan, ginapalingi Niini palayo ang akong ulo. Ang akong—akong kasingkasing nasangon na sa pag-higugma kaayo Kaniya, hangtud nga wala na ko'y gugma para niining kalibutana, bisan unsaon. Nasangon na kaayo ang akong pagbulot-an ilalum Kaniya, hangtud nga wala na gani ko nasayod karon kung unsa ang akong mga tinguha. Basta, ‘Bisan asa Mo man ako pagadad-on, magasunod ako, Ginoo.’ Mamahimo akong usa ka binilanggo.” Kita n’yo?

⁹⁹ Husto gayud nga usa ka binilanggo si Pablo. Wala siya nasayup sa iyang pamahayag. Gibansay siya sa Espiritu Santo, usab, nga maghulat sa Pulong. Karon, gibansay man siya kaniadto sa usa ka pamaagi, apan—apan gibansay siya sa Dios sa usa na usab ka pamaagi karon. Gibansay siya sa Balaang Espiritu nga maghulat sa Ginoo, bisan unsa pa ma’y iyang mga plano.

¹⁰⁰ Karon aduna ko’y, pinaagi sa tabang sa Balaang Espiritu, ipakita kaninyo. Kita n’yo? Karon mokuha lang kita og usa ka panghitabo.

¹⁰¹ Usa niadto ka adlaw, si Pablo ug si Silas, sa nagalakaw sila kaniadto sa dalan sa usa ka siyudad kon diin sila nagapahigayon og usa ka rebaybal. Ug dunay usa ka gamay’ng, giyawaan nga batang babaye ang padayong nagasunod-sunod kaniya, nagasinggit sa luyo niya. Ug sa walay pagduhaduha nasayod si Pablo nga aduna siya’y kagahum, ingon nga usa ka apostoles, sa paghingilin niadtong dautang espiritu sa maong babaye. Apan nahimatikdan ba ninyo? Naghulat gyud siya, sa matag adlaw, hangtud nga, sa kalit lang, nagpakigsulti ang Balaang Espiritu kaniya, miingon, “Mao na kini ang takna.”

¹⁰² Dayon miingon siya, “Ikaw nga espiritu, gumula ka kaniya.” Kita n’yo? Kabalo siya maghulat sa Ginoo.

¹⁰³ Ug dinha kon diin daghan kaayong mga tawo karon ang nagadala og kaulawan sa Pulong. Nagapangmisyon sila nga adunay ilang ambisyon. Pagkadaghan na og mga rebaybal nga nahimong wala ra gihapo’y epekto tungod sa ingon nianang butang, tungod nga dili nagahulat ang ebanghelistang mga hibaloong una kung unsay igasulti sa Ginoo! Moingon ang pipila kanila, “Umari kamo dinhi,” ug sila—mangadto dayon sila tungod kay ang—ang maong asosasyon miingon man, “Umadto

kamo.” Ug ang Balaang Espiritu nagsulti diay og butang nga lahi. Bisan pa niana, tungod sa ambisyon sa tawo nga mamahimong pang-estado nga presbiterio, o—o ingon niana, o usa ka elder, o usa ka obispo, o unsa man nga mopataas kaniya, “Kinahanglan kang moadto.” Ug, bisan pa niana, nasayod na gyud siya. Nagaingon ang Balaang Espiritu, “Umanhi ka *dinhi*.” Kita n’yo? Nasangon siya ngadto sa iyang organisasyon. Usa siya ka binilanggo ngadto sa organisasyon.

¹⁰⁴ Apan kung nasangon na siya kang Cristo, gipangunahan gyud siya sa Espiritu Santo. Siya...?..Kita n’yo? Siya, nasangon na siya, ingon nga usa ka binilanggo. Wala niya ginatagad kung unsa ma’y ginasulti ni kinsa man; kini—usa kini—kini’y usa—usa ra kini ka masaba nga agong ug nagatagingting nga piyangpiyang. Ang Tingog lamang sa Dios ang iyang ginapatalinghugan, ug mosulti lang siya pag-mopahayag na Kini. Dili siya nagasulti og unsa man.

¹⁰⁵ Adunay tawong moingon, “Oh, oh, Igsoong Jones!” Igsoong Roberts, o pipila, niining bantugang mga kalalaken-an sa atong nasud karon, sama ni Tommy Hicks, o—o—o ni Oral Roberts, o—o Igsoong Tommy Osborn, pipila nianang bantugang mga ebanghelista. Kung adunay tawong moingon, “Ikaw, umari ka dinhi, Tommy. Usa gyud ikaw ka halangdong tawo sa Dios.” (O si Oral.) “Ug ako—aduna ko’y usa—usa ka uyoan nga naghigda na lang dinhi, nga—nga dili na makalihok. Ug siya’y—masakiton siya. Gusto kong moanhi ka. Nagatoo ko nga aduna ka’y kagahum aron ayohon siya.” Kita n’yo?

Ug tingali’g ingnan siya sa Balaang Espiritu, “Dili pa karon.”

¹⁰⁶ Apan, bisan pa niana, tungod sa pagkahigala niya nianang tawhana, obligado siya nga moadto kaniya. Kay kung dili, mahimo na siyang kaaway nianang tawhana. Moingon kanang tawhana, “Bueno, miadto gani siya kang *ingon-ani-ug-ingon-ana*, giayo kadtong bata o kadtong batang lalaki. Nasayod gyud kong miadto siya. Ug ako nga dugay na niyang higala, sulod sa pila na ka tuig, kita mo, ug wala gyud niya ako giadtoan.”

¹⁰⁷ Apan kung gipugngan siya sa Balaang Espiritu nga dili moadto, kinahanglan dili gyud siya moadto, kung nasangon na siya ngadto sa Dios. Bisan iya pa kadtong higala, nga gihigugma niya. Apan kinahanglan gyud nga gipangunahan siya sa Dios nga moadto didto, tungod kay wala gihapo’y unsa man nga kaayohan ang mahimo niini, bisan unsaon. Nasinati ko na kana sa makadaghan nang higayon.

¹⁰⁸ Apan si Pablo kaniadto naghulat lang gyud sa Espiritu nga mosulti kaniya kung unsay pagabuhaton. “Hulaton ko ang Espiritu,” ingon niya. Mitindog siya usa niadto ka gabii, nga nagawali. Ug pagbiya niya didto. Nakita niya ang usa ka bakul nga tawo. Ug sa kalit lang, nakigsulti ang Espiritu kaniya, ug

miingon siya, “Nakita ko . . .” Sa unsa mang paagi? Sa mao gihapong paagi nga nakita niya nga malunod na sila kaniadto, duol sa usa ka isla. Kita n’yo? “Naila ko nga aduna ka’y pagtoo aron mamaayo. Tindog ka. Giayo ka na ni Jesus Cristo.” Kita n’yo? Tan-awa. Siya—siya’y . . . Nasangon na siya. Tingali’g nagpahigayon siya og usa ka semana nga rebaybal didto ug walay unsa man nga nahitabo, apan bisan pa niana gihulat gyud niya ang Balaang Espiritu nga manulti. Kita n’yo? Nasangon na siya niadto nga pagtawag.

¹⁰⁹ Karon moingon kamo, “Igsoong Branham, imo man ginabatokan ang imong gisulti niadtong miaging Dominggo, nga nagahulat ka sa gihapon hangtud niining panahona.”

¹¹⁰ Ug, bisan pa, inyong mahinumduman, nga ang Balaang Espiritu kadto ang misulti kanako didto sa dalan, ug miingon, “Igapadala Ko ikaw og balik ngadto sa mga adunay sakit ug nagaantus.” Kita n’yo? Ang pagkamasinugtanon kini ngadto sa Balaang Espiritu. Sigurado. Wala gyud ako miadto hangtud nga giingnan Niya ako nga buhaton kadto. Ginahulat ko kaniadto ang MAO KINI ANG GINAINGON SA GINOO, hangtud nga naangkon ko gayud ang MAO KINI ANG GIINGON SA GINOO. Karon, lahi ra kana. Kita n’yo? Karon, Kini, aduna Kini og kalahian. Oo.

¹¹¹ Gihulat niya kaniadto ang Pulong sa Gino. Naaghat siya sa Espiritu, nga buhaton lamang ang sugo sa Dios, kung ingon-ana nahimo na siyang binilanggo ni Jesus Cristo. Mga higala, kung mahimo lang unta kita nga mga binilanggo!

¹¹² Nasayod ko nga mainit gayud. Apan ako—gusto kong hisgotan ang duha pa ka tawo, kung gusto ninyo. Aduna pa ko’y mga unom o walo nga naisulat dinhi. Apan ako—gusto kong hisgotan na lang ang usa pa ka tawo o duha.

¹¹³ Hisgotan nato ang pagkatawo ni Moises. Natawo siya kaniadto ingon nga usa ka manluluwas. Ug siya—siya—nasayod siya niana, nga natawo siya ingon nga usa ka manluluwas.

¹¹⁴ Apan sa dili pa ako maghisgot mahatungod kang Moises, buut kong himoon kini nga pagpahayag, nga, ang Dios sa kanunay mogamit gyud og bisan kinsa nga tawo, nga tinud-anay mangalagad Kaniya, og mamahimo Niyang binilanggo. Kinahanglan nga isurender una sa tawo ang tanang mga ambisyon nga aduna siya, ang tanan-tanan kung unsa siya, ang—ang tanan, ang iyang kinabuhi, kalag, lawas, tinguha, mga ambisyon, ug ang tanang uban pa, ug aron mahimong bug-os, nga binilanggo ni Cristo, Kinsa mao ang Pulong, aron sa pag-alagad sa Dios.

¹¹⁵ Tingali’g kinahanglan mong maglakaw nga sukwahi sa imong mas maayong pangatarungan. Tingali, sa usa ka organisasyon, gadahum ka nga mahimo ka nilang ipataas ug hatagan og dakung butang, aron mahimo kang magarbohon.

Apan unsa ma'y makaplagan mo sa imong kaugalingon? Makaplagan mo ang imong kaugalingon nga walay-kadaugan, pagkahuman niana, hangtud nga mokuha na lang ang Dios og uban nga tawong andam nga mamahimong binilanggo Niya.

¹¹⁶ Nagapangita ang Dios og mga binilanggo. Kanunay na Niyang ginahimo kini. Mahimo n'yong susihon kini sa Kasulatan. Kinahanglan sa usa ka tawo nga mahimong usa ka binilanggo ni Cristo, batok sa unsa mang butang. Busa, dili ka puedeng nakasumpay sa bisan unsang butang kondili kang Cristo lamang; bisan sa imong amahan, sa imong inahan, sa igsoon mong lalaki, sa igsoon mong babaye, sa imong bana, sa imong asawa, ni kang bisan kinsa. Nakadugtong ka lang kang Cristo, ug Kaniya lamang, dayon puede ka nang gamiton sa Dios. Hangtud nga wala ka pa nakadugtong, dili ka puede magamit.

¹¹⁷ Diha sa mga pagsangyaw, usahay mabagison akong nagasulti sa mga tawo. Kita n'yo? Ako—ginapaninguhaan ko lang isulti kaninyo nga buhian n'yo na. Kinahanglan nga aduna ka'y mahimong sugdan, sama sa pagsaway usahay sa mga kababayen-an nga nagapaputol sa ilang mga buhok ug nagasul-ob sa ingon-niining mga bisti, ug padayon lang sa gihapon nagapahayag nga mga Cristohanon kono sila. Moingon, "Gamay ra kana nga butang." Bueno, kinahanglan n'yong mosugod sa kung asa man. Busa sugdan n'yo mismo dinha, sa inyong ABC's. Kita n'yo? Ug putla n'yo ang mga pagpangbisti nga iya sa kalibutan, bisan pa man, ug magmahimong binilanggo ni Cristo. Ug unya pagpadayon lang, putla ang tanan-tanan, hangtud nga sa kaulahian maputol na ang katapusang pisi. Dayon ikaw—ikaw. . . Ikaw usa na ka binilanggo kung ingon-ana. Nagunitan ka na Niya diha sa Iyang kamot. Siya, Iya kanang gigunitan.

¹¹⁸ Karon, hingsayran ni Moises nga natawo siya ingon nga manluluwas. Nasayod siya niana. Ug namatikdan ba ninyo, ang ambisyon nga aduna si Moises kaniadto; ingon nga nahibalo nga gisultihan na siya sa iyang inahan didto, tungod ang iyang inahan man mao'y iyang yaya.

¹¹⁹ Walay pagduhaduha, sa dihang natawo ang gamay'ng masuso nga si Moises, nga giingnan siya sa iyang inahan, "Kabalo ka, Moises, kaniadto. . . Ang imong papa, nga si Amram, ug ako kanunay gayu'ng nag-ampo. Nasayod kami, ug nahibaloan diha sa Pulong, nga panahon na gayud alang sa pag-abot sa usa ka manluluwas. Ug nag-ampo kami, 'Ginoong Dios, gusto namong makita kana nga manluluwas.' Usa niadto ka gabii, giingnan kami sa Ginoo, sa usa ka panan-awon, nga matawo ka kono, ug ikaw ang mamahimong manluluwas. Wala gyud namo kahadloki ang sugo sa hari. Wala namo panumbalinga kung unsa ma'y gisulti sa hari. Ug, nasayod kami nga natawo ka ingon nga usa ka manluluwas. Karon, Moises, nasayod kami nga dili ka namo maatiman og ayo."

120 Karon hinumdumi, nga dugay na silang atua didto, upat na ka gatus ka tuig sa Egipto. Kita n'yo?

121 “Ug among—gusto namo nga mahatagan ka og—og maayo nga butang, maayong edukasyon, maayong pagbansay. Mao nga, gikuha ko ikaw ug gisulod sa usa ka gamay'ng arka, ug gipaano ka ngadto sa Nile. Ug makahibulong, nga gianod man sa mga sulog ang gamay'ng arka latas sa mga bagakay ug mga tangbo, ug dire-diretso nga gianod kini, mga milya na ang gilay-on, ug midunggo kini ngadto mismo sa palasyo ni Faraon, kon diin ang iyang. . . atua ang anak nga babaye ni Faraon, didto mismo sa ligoanan niini. Ug ingon nga—nga nasayod ko nga magkinahanglan gyud siya og usa ka babaye aron mag-atiman kanimo.”

122 Ug kaniadtong mga panahona, siyempre, wala man sila'y ingon-niining mga biberon aron padidihon lang ang mga masuso, mao nga magkinahanglan gyud siya og usa—usa ka babaye nga nagapasuso. Busa. . .

123 “Mao nga, si Miriam, gisugo ko siya. Ug mitindog siya didto ug ingon siya, ‘Kabalo ko kung asa ako makapangita og usa ka babayeng nagapasuso,’ ug giadtoan niya ako ug gidala didto. Ug, didto si Moises, og gisirhan ang tanang mga pultahan. Palangga, dise-sais anyos ka na karon, ug mamahimo kang anak ni Faraon. Ug sa umaabot nga adlaw ikaw ang mamahimong manluluwas nga mao'y magpahigawas sa mga katawhan dinhi.”

124 Midaku nga midaku ang mga ambisyon ni Moises kaniadto. “Magtuon ako, mama. Tun-an ko ang tanan nga mahimo ko. Kabalo ba ka kung unsay akong pagabuhaton? Magtuon ko kung unsaon nga mahimong usa ka tawong sundalo, ug aron makahibalo ko kung unsaon sa pagpahigawas gikan dinhi kini nga katawhan. Mamahimo gyud akong bantugan nga heneral, obispo, mao nga makahibalo na ko kung unsaon pagbuhat niini. Ug akong—ipahigawas gyud nako kini. Mograduwar usa ko sa akong Ph.D o LL. Buhaton ko kini.”

125 Sama ni “Padre Chiniqy,” kung nakabasa na mo sa iyang mga libro. Bueno. Iya konong “ipahigawas usab ang tanang mga Protestante,” kabalo mo, ug nahimo siyang usa ka protestane, mismo. Ug, kining halangdon nga pari, pila na ka tuig ang milabay, “si Padre Chiniqy,” maayo gyud kung makapalit mo sa iyang libro ug mabasa n'yo kini. Ginatawag nila siyang, “padre.” Siya'y si Igsoong Chiniqy, nga angay lang. Dili nato ginatawag ang si kinsa mang tawo nga “padre,” nga sama niana. Ug mahibaloan nato nga—nga atong. . . Mobasa siya og Biblia, aron makaadto siya didto ug ipanghimakak ang Protestanteng relihiyon ug ibalik silang tanan sa pagka-Katoliko. Ug sa pagbasa na niya og Biblia, mikunsad ang Balaang Espiritu kaniya, ug nabaton niya ang Espiritu Santo, ug dayon—dayon nahimo na siya hinoon og usa kanila.

¹²⁶ Ug dayon himatikdi kini, naangkon ni Moises kaniadto ang tanan niyang mga pagbansay. Tungod, siya—nasayod na man siya. Siya’y utokan kaayo, edukado gayud, ug grabe ka intelektuwal! Hangtud nga, walay si bisan kinsa. . . Mahimo gani niyang tudloan ang mga Egiptohanon. Hangtud nga, mahimo na niyang tudloan ang ilang mga sikolohista. Mahimo niyang tudloan ang ilang—ilang mga heneral kung unsa gyud ang puwersa-militar. Usa siya ka bantugang tawo. Ug gikahadlokang gyud si Moises sa mga tawo kaniadto, tungod sa iyang pagkabantugan. Oh, grabe nga kinaadman! Grabe! Daw sa usa siya ka arsobispo, o siguro mora’g usa ka papa. Usa siya ka bantugan nga lalaki. Ug siya’y usa—usa—usa ka gamhanang tawo. Ug hingsayran niya nga natawo siya aron buhaton ang ingon-niadto, ug nagbansay siya, tungod sa dakung tinguha, nga buhaton kadto.

¹²⁷ Sama ra karong panahona. Dili ko ginaingon nga ang mga kalalaken-an, nga nagpabansay sa ingon-niini nga mga tulonghaan, dili ko ginaingon nga. . . Sama kanila dinhi sa Kasadpan karon, nga magtukod kono sila og usa-ka-gatus-ug-singkwenta-ka-milyon-ka-dolyares nga eskwelahan sa teolohiya, kita n’yo, Pentecostal, usa—usa ka-gatus-ug-singkwenta-ka-milyon-ka-dolyares nga eskwelahan. Para kanako, kana’y sa mga misyonero na lang unta diha sa natad sa pagpang-misyon. Kita n’yo? Kita n’yo? Kita n’yo? Apan, bisan unsa pa man, unsa kaha’y pagabuhaton nila pag-mograduwar na sila dinha? Unsa na man sila? Pundok sa mga Ricky. Eksakto gayud. Ug dayon ingon na niana sila. Kanunay na kanang ingon-niana, ang tanang uban pa kanila, ug mao ra kana nga laray. Kita n’yo?

¹²⁸ Karon atong nahibaloan, nga, kaniadto, si Moises, bisan pa sa tanang niyang mga pagbansay, ug sa karong panahon, bisan pa sa tanan nilang mga pagbansay, nagapagraduwar og bantugang mga obispo ug uban pa, dagkung, hataas nga mga ambisyon, unsa ma’y ginabuhat nato? Ang atong mga ambisyon nahimo na lang og sama sa kung unsa ang kang Moises kaniadto. Kita n’yo?

¹²⁹ Ang Dios, sa dili pa Niya magunitan ang tawo sa Iyang kamot, kinahanglan una Niyang hukasan siya sa iyang ambisyon. Kinahanglan una Niyang hukasan kini sa tanang mga gibansay niini.

¹³⁰ Ngani miadto siya, ug gisulayan niyang ipahilingkawas sila; napatay niya ang usa ka Egiptohanon. Ug siya, sa dihang napatay niya, naamgo niya nga sayup diay siya. Dili niya diay arang mahimo kadto. Dili diay unta ingon niadto nga paagi. Ug mao nga kinahanglan siyang dalhon sa Dios ngadto sa kamingawan, ngadto sa disyerto, sa usa ka dapit nga awaaw.

¹³¹ Himatikdi ninyo, daw sa talagsaon, nga kini nga mga kalalaken-an, pag-aduna'y mensahe ang Dios para kanila. Ginadala Niya una sila ngadto sa kamingawan.

¹³² Gidala Niya si Pablo kaniadto sa kamingawan, aron bansayon siya, aron sultihan siya kung unsa kadtong halangdon nga panan-awon, didto sa kamingawan. “Umadto ka sa usa ka disyerto.” Ug nagpabilin siya didto hangtud nga bug-os gipahayag sa Dios kaniya kung unsay pagabuhaton.

¹³³ Ug sa panahon usab ni Moises, gidala Niya siya didto sa kamingawan. Gipapuyo siya didto sulod sa kuwarenta ka tuig, ug gihukas kaniya ang tanan niyang teolohiya ug ang tanan niyang mga ambisyon. Oh, pagkaanindot nga panahon, nga nakapamalandong siya kaniadto ug naamgo niya ang iyang kapakyasan. Ug kita usab, karong gabhiona, angay ra nga buhaton nato ang mao rang butang, pagmaamgo nato ang atong ambisyon.

¹³⁴ Tan-awa ninyo ang dakung buluhaton sa pagpang-ayo, ug tan-awa ninyo kung nagbuhat ba ang Ginoo og usa ka butang pipila na ka tuig ang milabay, nga sugdan ang pagpahibalik og kaayohan ngadto sa mga masakiton, ug uban pa.

¹³⁵ Ang tanan, sa matag organisasyon, tungod nga wala Kini miabot sa ilang organisasyon, mao nga kinahanglan nilang magkaaduna usab og usa ka mananambal. Ug unsa ma'y gibuhat nato? Ato kining tan-awon sa makadiyut lang. Gibuhat usab nato ang mao gihapong butang nga gibuhat ni Moises kaniadto. Misangyaw kita ug naningkamot og ayo nga makapagawas og unsa man nga matang sa milagro. “Nakasimhot ko og balatian. Ako—ako—adunay dugo sa akong kamot,” ug maghimo-himo og usa ka milagro. Kita n'yo? Ug unsa ma'y atong nakuha? Pipila ka mga kalalaken-an nga nangahingawa og ayo, nangapukan na hinoon ug nangahimong mga palahubog, nerbiyoso, ug nangadaut ang ilang mga panghunahuna. Ug bug-os silang nangbalik, ingon nga anaa na unta sila sa kahan-ayan sa pang-pentecostal nga katuyoan, namalik hinoon sa pagpangtukod og mga organisasyon ug ingon-nianang mga butang pag-usab. Kita n'yo?

¹³⁶ Unsa ma'y atong gibuhat? Nagpatay og usa ka Egiptohanon. Husto kana. Ug naninguha kita. Nanglimbasog kita. Nagbayad kita. Nanaghago kita, tibuok gabii nga nagtambong sa mga panagtigum sa pag-ampo, hangtud nga wala na kita'y tingog. Ug—ug naninguha nga makapagawas og unsa man, ug naghimo-himo og unsa man, ug tanan nang ingon-niining matang sa mga butang, ug nakaplagnan nga pakyas ra diay tanan. Nagkinahanglan kita og mga pagbalik ngadto sa kamingawan. Husto. Oo, sir. Mga kapakyasan ug mga pagpanglimbasog. Nganong dili na lang kita mosurender? Mao kana ang angay natong buhaton, kita n'yo, ang mobalik ug mosurender.

Aba, gibuhat nato ang mao gihapong butang nga gibuhat nila kaniadto, mao pud nga butang ang gibuhat ni Moises. Walay unsa man nga kaayohan ang nahimo niana. Human pa sa kuwarenta ka tuig, nga nakaplagaan niya ang iyang kaugalingon nga usa ka binilanggo sa Pulong sa Dios. Unsa ma'y ginapaninguhaan natong buhaton?

¹³⁷ Sa dihang, moabot na ang dakung Panalangin, ug ang pagpadayag sa tanan niining halangdong mga butang nga gisulti sa Dios kanato: daw sa unsa nga kinahanglan gyud natong matawo pag-usab; ug daw sa unsa nga kinahanglan natong madawat ang Espiritu Santo; ang bautismo sa Ngalan Ni Jesus Cristo; ug ang tanan niining mga butanga dinhi.

¹³⁸ Nakita n'yo, ang mga tawo, imbis nga magpabilin unta sa Pulong, ug mahiktan ngadto Niini, unsa ma'y ginabuhat nila? Misugod na pud sila sa kaugalingon nilang denominasyonhong teorya, nga human nang napakyas kaniadto, ug naninguha sa paghimo-himo og butang nga susamang tan-awon sa Kamatuoran.

¹³⁹ Maayo pang mohunong na ko dinha mismo. Kita n'yo? Sigurado kong duna mo'y igong kaalam nga mahibaloan kung unsay buot kong ipasabot. Kita n'yo? Apan, aba, tan-awa ninyo kung unsay nahitabo niini. Hunahunaa ninyo kini.

¹⁴⁰ Unsa ba'y anaa nato, karong gabhiona? walay lain kondili usa—usa—usa ka nasud nga puno sa organisadong mga tawo: nga ginapanghimakak ang mga Kasulatan sa Dios; nga ginatawag ang—ang—ang Kinabuhi sa Balaang Espiritu, nga, “Kini'y usa—usa ra ka mental telepathy”; nga magdumili sa maong butang nga mosulod sa ilang iglesia; ug dili pa gyud ka nila tugotang mosulti og usa ka Pulong mahatungod sa binhi sa serpente, Eternal nga kasiguradohan, ug sa mga butang nga gipadayag na sa Balaang Espiritu ug gipanghimatud-an nga mao ang Pulong. Naghimo ako og mga paghagit, nga dunay moduol ug pamatud-an kanako nga sayup kini.

¹⁴¹ Unsa ma'y nakuha nila? Ang mao gihapong butang nga aduna si Luther kaniadto, ang tanang uban pa kanila, kita n'yo, mipatay og usa ka Egiptohanon. Unsa man . . . Unsa man kadto? Tingali'g gihimo niya ang usa ka tawo nga mosugod . . . mohunong na sa pagpangawat, o tingali magkinabuhi nga matinud-anon na sa iyang asawa. Apan, unsa ma'y inyong gihimo kaniya? Usa ra ka miyembro sa iglesia. “Ari ka ug apil sa among grupo.” Kita n'yo?

¹⁴² Kadtong mibaho na nga patay'ng tawo mao lang kadto ang butang nga mahimong maipasundayag ni Moises, ingon nga milampus siya, sa kuwarenta ka tuig niya nga pagbansay; usa ka mibaho nang Egiptohan nga nagbuy-od didto, nadugta ug patay na.

143 Ingon niana usab kini karong gabhiona. Ang butang lang nga mahimo natong maipasundayag, nga resulta niining rebaybal nga nagmalampuson (kono), mao kining pundok sa nagakabaho na nga mga miyembro sa iglesia nga wala gayu'y nahibaloan mahitungod sa Dios sama sa usa ka Hottentot nga walay nahibal-an mahitungod sa kabalyerong Egiptohanon. Husto. Nga, pag sultihan mo sila mahitungod sa Pulong sa Dios, moingon ra sila, “Wala ako nagatoo Niana.” Moingon pa, “Dili ko igsapayan kung unsa ma’y imong ginasulti, dili gyud ko motoo Niana.” Kita n’yo? Kita n’yo? Usa kana ka makalilisang nga butang nga igapasigarbo nato, bisan pa sa tanang mga paghago ug mga pagpanglimbasog ug sa tanan-tanan nga aduna kita.

144 Tingali’g mahimo natong ipasigarbo ang usa ka dakung tulonghaan, apan patay kana. Mahimo natong ipasigarbo ang usa ka organisasyon, apan patay kana. Baho na kana. Sama ra kini sa unang butang nga ato nang gihisgotan. “Sama sa usa ka baboy nga mibalik sa lunangan niini, ug ang usa ka iro ngadto sa suka niini,” pagmobalik kita. Usa ka patay na nga Egiptohanon.

145 Walay pagduhaduha nga adunay tawong miingon kaniadto, “Moises, bueno, wala ka na ba’y kalooy para sa mga tawo? Tinawag ka aron buhaton kini.” Usa ka tawong nakaila kang Moises, ug nasayod nga tinawag siya alang niadto. “Ug wala . . . Wala ka na ba’y kalooy para sa mga tawo?”

“Dili, sir.”

146 “Bueno, nganong dili ka man moadto, didto, aron buhaton ang *ingon-niini*? Ug nganong ania man ka dinhi, nga ginapaninguhaan ang *ingon-niini*? Ug nganong dili mo man ipadayon didto uban kanilang tanan?”

147 Atua si Moises didto nga ginahukasan, hangtud nga nagkaaduna siya og kasinatian didto sa nagadilaab nga sapinit, nga nagpahayag sa Pulong. “Ako Mao ang Dios ni Abraham, ni Isaac, ug ni Jacob. Ug nahinumduman Ko ang Akong saad. Ug mikanaug Ako aron luwason sila. Ginasugo Ko ikaw aron buhaton kini.” Mao na kadto.

148 Nakita niya ang Pulong, dili ang ambisyon sa mga tawo o ang mga tinguha sa mga tawo. Dayon unsa ma’y nahitabo kaniya? Ayaw na niya unta atubangon pa ang mga Egiptohanon. Ayaw na niya unta atubangon pa kini nga butang. Apan nahimo siyang usa ka binilanggo. Amen. Kuwarenta ka tuig siya nga mikalagiw, nahukasan, apan nahimo ra gyud siyang usa ka binilanggo, didto sa nagadilaab nga sapinit, ang gamhanang si Moises uban sa tanan niyang kahibalo. Nagaingon ang Biblia nga si Moises kaniadto usa ka gamhanang tawo sa pulong ug sa buhat, didto sa Egipto.

149 Apan matikdi kung unsay gihimo niadtong gamhanang teologo sa Presensiya sa nagadilaab nga sapinit. Gipahayag lang niya ang iyang pagkawalay-kasarang. Sa dihang nakita na niya

ang tinuod nga katuyoan sa Dios, gipahayag niya nga wala siya'y kasarang sa pagbuhat niadto. Bisan pa, nga gibansay siya sa tanang teolohiya nga mahimo nilang itudlo kaniya, bisan pa nga gibansay siya sa pinakamaayo nilang tulonghaan kaniadto. Apan, sa gihapon, unsa ma'y mahimo niya sa dihang siya . . . atua sa atubangan niadtong Haligi nga Kalayo didto nga nagapabilin sa sapinit? Miingon, "Dili gani ko makasulti Kaniya. Ginoo, kinsa ba ako, aron ako moadto?" Kita n'yo?

¹⁵⁰ "Tangtanga ang imong mga sapatos, Moises. Gusto Kong makigsulti kanimo. Hukasa ang imong kaugalingon, bisan ang imong mga sapatos. Ikaw—nagyükbo ka diha sa yuta usab. Gusto Kong makigsulti kanimo."

¹⁵¹ Dili gyud siya makasulti. Sa katapusan, ang maong pinili nga binilanggo, ang maong pinili nga propeta, sama kang Pablo nga pinili usab. Pinili si Moises, nga manluluwas kaniadto. Ug dayon, sa katapusan, gihimo sa Dios ang Iyang pinili nga tawo nga mamahimong usa ka binilanggo Kaniya. Oh, alleluyah! Makalihok lamang siya kung palihokon siya sa Pulong sa Dios. "Kinsa man ang igasulti ko nga nagsugo kanako?"

"AKO MAO."

"Unsaon ko man pagbuhat?"

"Ako magauban kanimo."

¹⁵² "Oo, Ginoo, basta sumala sa Imong gisulti. Ania ako." Oh, grabe! Ingon nga, usa na siya ka binilanggo.

¹⁵³ Gisupak niya ang iyang mas maayong pangatarungan. Ngani, gibansay siya aron mangulo og kasundalohan. "Ang mga espada, ipataas! Biyo!" Gibansay aron sa pagsulong, "Ang mga carro, ihan-ay ang tanan! Ang mga bangkaw, ipunting na! Atake!" Ingon niana kung unsaon niya mandoan kadto. Ingon niana ang pagbansay kaniya.

Apan ingon siya, "Unsa ma'y akong pagagamiton?"

Giingnan siya, "Unsa ma'y anaa sa imong kamot?"

¹⁵⁴ "Usa ka sungkod." Nagabuhat ang Dios og mga butang nga kataw-anan kaayo usahay, para sa hunahuna sa tawo. Kita n'yo? Aduna siya'y sungkod sa iyang kamot. Nakadunghay ang mga bangas. Otsenta anyos na ang panuigon. Nagsakay ang iyang asawa sa usa ka mula; nga ginasabak ang bata sa bat-ang niini. Ang gagmay'ng, nagkunot ug mahuyang niyang mga bukton nangyatyat na; dala ang usa ka sungkod. Ang ulo lang niya ang nakataas, tungod anaa man kaniya ang MAO KINI ANG GINAINGON SA GINOO. Ngano man? Tungod nga nakaangkla na gyud siya.

¹⁵⁵ Usa siya ka binilanggo. "Molihok lamang ako pag-palihokon ako sa Pulong. Manulti lamang ako kon diin nagasulti ang Pulong."

“Asa ka man moadto?”

¹⁵⁶ “Aduna gisugo kanako: nga motindog ko sa atubangan ni Faraon ug ipakita kaniya, pinaagi niini nga sungkod, nga gisugo ako sa Dios.” Amen.

“Unsa ma’y imong pagabuhaton human niana?”

“Igahatag ra Niya ang sunod nga butang, pagkahuman kong buhaton kini.”

¹⁵⁷ Mao kana. Aduna ka og usa lang ka butang nga pagabuhaton, ang unang lakang, karong gabhiona: ang mosurender, ug mamahimong usa ka binilanggo. Ayaw na hunahunaa ang imong kaugalingon o ang uban pang butang. Magmahimong usa ka binilanggo.

¹⁵⁸ Nahimong binilanggo si Moises, ug nagpahayag nga dili gani siya makasulti. Sa katapusan, sa dihang nagunitan na siya sa Dios sa Iyang kamot, kon diin makalihok lang siya kung asa siya palihokon sa Dios. Sa dihang, gisultihan Niya siya sa Pulong. Nasayod gyud siya nga mao kadto ang Pulong, dayon gitugyan niya ang iyang kaugalingon ngadto sa Pulong. Ug ang Balaang Espiritu didto, ang Dios, gihiktan dayon si Moises ngadto sa kabubut-on sa Dios.

¹⁵⁹ Ingon niana usab ang gibuhat Niya kang Pablo kaniadto. Husto ba? [Nagaingon ang kongregasyon, “Amen.”—Ed.] Gihiktan Niya si Pablo; ang gamay’ng, hiwi og ilong, mahalang manulti nga Judeo, oh, duna pa’y titulo sa pagka-Ph.D. ug LL.D. nga nagapaila kaniya. Apan ingon sa Dios, “Ipakita Ko kaniya kung unsay iyang pagaantuson tungod sa Pulong.” Kita n’yo? Ug siya . . .

¹⁶⁰ Ug ingon nga nagalingkod si Pablo didto ug nakita ang Pulong, ug nakita niya nga si Jesus kadto, dayon gipataas niya ang iyang mga kamot ug nagpahikot na Kaniya. Gihikot siya sa gugma sa Dios ngadto sa Pulong. “Pagadalhon niya ang Akong Ngalan ngadto sa mga Gentil.” Siya’y miadto dayon.

¹⁶¹ “Moises, AKO MAO ang Dios sa imong mga ginikanan. AKO MAO ang Dios ni Abraham, ni Isaac, ug ni Jacob. Nahinumduman Ko nga nagsaad Ako kanila, ug ang maong panahon sa saad nagkahaduol na. Ug nakita Ko ang mga kaguol sa Akong katawhan. Nahinumduman Ko ang Akong saad. Ug mikanaug Ako aron hiktan ikaw. Nasayod ka kung unsay giingon sa Pulong. Hiktan Ko ikaw aron moadto didto, gihikot Ko kanimo ang gahum, sa pag-adto mo didto ug aron nga ipahigawas ang Akong katawhan. Ug dad-a kanang sungkod sa imong kamot, ingon nga saksi, tungod kay nakita mo na ang milagro nga nabuhat pinaagi niana.” Sama ra kang David kaniadto, nga gamit ang lamboyog. Kita n’yo?

¹⁶² Sa nahiktan na, ang iyang kaugalingon, ug miadto siya didto. Sa katapusan, nagkaaduna na ang Dios og usa ka tawo nga

nagpailalum Kaniya, nahikot ngadto Kaniya, ug dili puedeng molihok gawas kung palihokon siya sa Pulong sa Dios. Kung buhaton lang unta kana sa mga tawo, sa karon! Kung ingon-ana, siya'y binilanggo na Niya, binilanggo sa gugma, nasangon na ngadto sa pagkagapus sa gugma, ngadto sa—sa Dios, sama ni Pablo usab nga nasangon sa pagkagapus sa gugma ngadto sa Dios.

¹⁶³ Sama ni Pablo, pareho silang gibansay sa mao ra nga paagi. Gibansay si Moises, kabalo na mo, aron ipahigawas ang mga anak sa Israel pinaagi sa puwersang-militar. Gibansay usab si Pablo aron ipahilingkawas sila gikan sa mga kamot sa mga Romano ug mamahimo silang gawasnon, pinaagi sa iyang gamhanang puwersa pang-simbahan nga anaa sa kalibutan niadtong panahona. Naka-eskuwela sa bantugang mga eskwelahan kaniadto, gibansay ilalum ni Gamaliel.

¹⁶⁴ Ug pareho pud silang miadto sa kamingawan; nga mibalik nga lahi na nga mga lalaki. Pareho nilang nakita ang Haligi nga Kalayo. Ug pareho silang mga propeta. Husto ba? [Nagaingon ang kongregasyon, “Amen.”—Ed.] Pareho gyud silang, mga propeta. Ug pareho pud silang naestorya sa Haligi nga Kalayo, eksakto gayud, miadto didto ingon nga usa ka manluluwas. Atua sila didto; miadto sa disyerto. Gibiyaan ang ilang mga panimalay ug miadto sa kamingawan, aron hibaloon. Gibiyaan ang ilang pamilya ug tanan na, aron hibaloon ang kabubut-on sa Dios. Kita n'yo?

¹⁶⁵ Gibansay sila sa usa ra ka pamaagi; gibag-o sila sa Dios nga mamahimong lahi na. Ug kinahanglan nga mamahimo silang bug-os nga binilanggo, nga dili sila manglihok sa paagi nga gusto nilang manglihok, kondili manglihok sila sa paagi nga gusto sa Dios nga manglihok sila. Siya mao sa gihapon kagahapon, karon, ug hangtud sa kahangturan.

¹⁶⁶ Anaa pa ba kita'y dugang pa nga diyes minutos dinha, aron humanon kini? [Nagaingon si Igsoong Neville, “Amen.”—Ed.]

¹⁶⁷ Agpason kong hisgotan ang usa na usab ka tawo. Makita ko ang usa sa atubangan ko karon. Ang iyang ngalan mao si Joseph. Usa siya ka pinili nga anak. Usa siya ka hingpit nga tipo ni Jesus Cristo. Natawo siya ingon nga usa ka propeta. Usa siya ka propeta, usab. Kita n'yo? Ug mao nga makakita siya og panan-awon. Ug sa usa pa lang siya ka batan-ong lalaki kaniadto, nakakita siya og usa ka panan-awon mahitungod kaniya nga nagalingkod sa usa ka trono, ug ang iyang mga igsoon nanagyukbo kaniya. Kita n'yo? Apan bantayi. Nahimo siyang. . . Nabati niya nga daw sa usa siya ka halangdong tawo. Kita n'yo? Silang tanan. . .

¹⁶⁸ Apan unsa ma'y gikinahanglan nga buhaton sa Dios? Gibuhat Niya usab ang mao rang butang nga Iyang gibuhat sa tanang uban pa kanila. Ingon nga, usa ka manluluwas si Moises,

usa ka manluluwas si Pablo, ug karon usa usab ka manluluwas si Joseph. Giluwas niya ang iyang katawhan sa dakung kagutom kaniadto.

169 Unsa ma'y kinahanglan buhaton sa Dios kaniya? Ibalhog siya sa bilangoan, gibalhog siya mismo ngadto sa bilangoan. Oo, sir. Hinumdumi, nga gibaligya siya una sa iyang mga igsoon, ngadto sa usa ka Egiptohanon. Ug gibaligya pud nila siya kang Potiphar. Ug gihatagan siya ni Potiphar og diyutay'ng kagawasan, ug, nahibal-an na lang, giwagtang kadto gikan kaniya. Ug didto siya nagalingkod na sulod sa bilangoan, nagahilak, nagahilak og ayo. Gikinahanglan sa Dios nga wagtangon kadto.

170 Karon himatikdi. Apan, sa tanang panahon, nagatoo kong, siya, sa sulod niadtong bilangoan, matiman-an niya ang giingon sa maong panan-awon nga magalingkod kono siya sa usa ka trono, ug mangyukbo kaniya ang iyang mga igsoon, tungod kay nasayod siya nga ang iyang gasa nagagikan man sa Dios. Ug nasayod pud siya nga kinahanglan mamatuman gyud kana.

171 Kung mahimo lang unta natong ibutang gyud kini sa atong hunahuna, ug sumala sa Pulong sa Dios, nga sa niining kaulahiang mga adlaw magkaaduna Siya og usa ka Iglesia, magkaaduna Siya og usa ka katawhan. Ug kining mga butang nga Iyang gisaad, Iyang pagatumanon kini. Miingon Siya nga pagabuhaton gyud Niya, ug nagapuyo na kita sa maong panahon. Ania na mismo kita. Ginapaninguhaan lang usa' Niya nga mamahimo kitang tinuod nga mga binilango karon, nga nabilango na gyud Kaniya.

172 Nakadungog na ba mo nianang karaang alawiton nga ginakanta nila, "Ug dayon ako'y usa na ka binilango sa Dios"? Gusto kong mamahimong binilango sa Dios. Karon, dinha ko nahunahunaan ang mahitungod niini. Ingon nga binilango sa Dios, wala na'y lain pa, ug molihok ka lang pagmoingon na ang Dios nga molihok ka. Buhaton mo lang ang sumala sa ginaingon sa Dios nga pagabuhaton, kita n'yo, kung ingon-ana kamo'y mga binilango na sa Dios.

173 Karon hinumdumi, nagahunahuna siya kaniadto. Bug-os siyang napakyas usab, sa iyang kaugalingon. Ang tanan niyang nahibaloan, ang tanan niyang nasabtan, ug tanan na, siya'y bug-os diay nga napakyas. Wala kadto nagpulos. Napahimutang siya sa usa ka kahimtang diin wala gyu'y ni usa ang gustong maminaw kaniya. Usa siya ka binilango. Kita n'yo? Napahimutang siya sa usa ka kahimtang, diin ayaw motoo ang mga dili-magtotoo. Nasabtan n'yo ba ang buot kong ipasabot? [Nagaingon ang kongregasyon, "Amen."—Ed.] Wala gyu'y epekto ang iyang ministerio. Gilingo-lingo ra sa mga tawo ang ilang ulo. Wala gyud nila siya panumbalinga sulod sa bilangoan. Unsa na lang nga kaayohan ang mahimo sa iyang ministerio?

Mitindog siya tingali sa mga rehas sa bilangoan ug nagwali kanila; og padayon ra silang maglakaw diha sa dalan. Kita n'yo? Apan nahimo siyang binilango. Ug gitipigan siya sa Dios, ingon nga usa ka binilango, hangtud nga mituyok ra ang ligid sa husto. Miingon, "Ania ang Akong tawo." Himaya! Bug-os nga napakyas!

¹⁷⁴ Sa katapusan, giduaw siya sa Dios sulod sa iyang bilangoan. Sama ni Pablo, sama sa tanang uban pa kanila, miduaw usab Siya kaniya. Ug gigamit Niya ang gasa nga Iyang gihatag kaniya, aron ipahigawas siya didto. Husto kana. Gipahigawas Niya siya sa iyang bilangoan. Unsa ma'y gibuhat ni Joseph? Sa dihadhi nga gipahigawas na Niya siya gikan sa iyang bilangoan, gihatagan siya og kagahum sa hari, sa iyang hari, ingon nga magalingkod siya sa kiliran niini, diin siya napailalum. Napahigawas siya gikan sa bilangoan ug gihatagan og kagahum; hangtud nga, bisan unsa ma'y igasulti niya, kinahanglan mamatuman gayud. Amen.

¹⁷⁵ Sulod sa iyang bilangoan, kanunay niyang gitiman-an, nga natawo siya alang sa usa ka katuyoan. Magalingkod siya sa kiliran sa usa ka hari. Ang tanang uban pa kanila mangluhod kaniya. Mao kana ang gisulti sa iyang panan-awon kaniya. Amen. Apan sa dili pa nga bug-os mamatuman ang iyang panan-awon, kinahanglan niya una nga mahimong usa ka binilango. Amen. Ug pagkahuman nahimo na siyang usa ka magmamando. Ug sa napahigawas na siya kaniadto gikan sa iyang bilangoan, ug nahimo siyang usa ka binilango sa Pulong sa Dios, aron igo lang niyang isulti kung unsay ibutang sa Dios sa iyang baba nga igasulti, dayon namuhat ang Dios pinaagi kaniya.

¹⁷⁶ Himatikdi, nga si Moises usab adunay kagahum kaniadto nga ibilango ang mga prinsipe ni Faraon, sa kinaugalingon niyang kabubut-on. "Kung magaingon ka niining bukid, 'Pahawa.'" Aduna siya'y kagahum nga gapuson ang mga prinsipe ni Faraon. Bisan sila pa'y mga representante sa estado o bisan unsa pa sila. Pagmoingon siya, "Ibilanggo ko kamo," ug mabilanggo gyud sila. Ingon niana kadto. Mahimo niyang buhaton kadto sa pagsulti niya lang, sumala sa kaugalingon niyang kabubut-on. Amen. Himaya sa Dios!

Oh, aduna pa ko'y mga tulo na lang ka minuto, aron humanon ang akong gisulti.

¹⁷⁷ Karon nahibaloan nato, nga siya—nahimo siyang usa ka binilango sa Dios, gikan sa pagka-binilango sa kalibutan. Gikan sa... Si Pablo usab, mao gihapon. Ug si Moises, mao gihapon, gikan sa pagka-binilango sa kaugalingon niyang panghunahuna, ngadto sa pagka-binilango sa Dios. Ug sa pagkalingkawas niya, aduna na siya'y gahum nga iya sa Dios. Ug sa nahimo na siyang Pablo... Sa diha nga ang kaniadtong

panghunahuna, ni Moises, nga iya kadtong gisurender ug nahukasan niini, dayon nahimo siyang binilanggo sa Pulong ni Cristo. Makalihok lang siya kung . . .

“Moingon ka, ‘Ni Cristo?’”

178 “Giisip niya ang pasipala nga pagaantuson alang kang Cristo ingon nga labi pa ka dakung bahandi kay sa mga bahandi sa Egipto.” Busa siya’y usa ka binilanggo ni Cristo, sama ra usab kung unsa si Pablo kaniadto.

179 Hinumdumi, silang tulo’y mga propeta. Kita n’yo? Ug gikinahanglan nilang mahukasan sa kaugalingon nilang panghunahuna, aron nga mamahimong binilanggo ngadto sa kabubut-on ug sa mga pamaagi sa Dios.

180 Dayon atong mahinumduman, karon, nga aduna usab siya’y kagahum sa pagpanggapus, sa pulong niya lang. Aduna pud siya’y kagahum sa pagbadbad, sa pulong niya lang. Mahimo niyang isulti, “Ginabadbaran ko ikaw, sa ngalan sa akong hari.” Amen. Gihimong anak ni Faraon si Joseph kaniadto.

181 Ginahimo usab ni Cristo ang Iyang, mga binilanggo sa gugma, nga Iyang mga anak. Ug ginahatagan pud Niya sila og kagahum, sa mao rang butang nga aduna Siya. San Juan 14:12, “Ang nagatoo Kanako,” kita n’yo, “ang mga buhat nga Akong ginabuhat pagabuhaton usab niya. Gani mas daghan pa niini ang pagabuhaton niya.” Karon ang binilanggo sa gugma ni Cristo gihatagan na og gahum sa iyang Hari, Kinsa mao si Cristo. Amen. “Ug sa pagkatinuod magaingon Ako kaninyo, kung moingon ka niining bukid, ‘Pahawa,’ ug dili ka magduhaduha sulod sa imong kasingkasing, kondili nga toohan ang kung unsay imong gisulti mamatuman gayud, maangkon mo kung unsay imong gisulti. Kung nagapabilin kamo Kanako, ug ang Akong Pulong nagapabilin kaninyo; kung nasangon kamo Kanako,” tungod kay Siya ug ang Iyang Pulong mao ra man. “Sa sinugdan mao na ang Pulong, ug ang Pulong kauban sa Dios. Ang Pulong nahimong unod ug nagpuyo ipon kanato. Ang mao sa gihapon kagahapon, karon, ug hangtud sa kahangturan! Kung nagapabilin kamo Kanako,” dili nga dinhi ug didto. “Nagapabilin Kanako, ug ang Akong Pulong nagapabilin kaninyo; pangayo kamo sa bisan unsa nga buot ninyo, o isulti ang bisan unsa nga buot ninyo, kini pagabuhaton alang kaninyo.” Aduna Siya’y gahum.

182 Himatikdi, sa wala pa siya gibuhian, kinahanglan niya una nga dalhon didto ug aron mahimungotan. Kinahanglan niya una nga maahitan og pipila ka mga butang sa dili pa niya mahinagbo ang iyang hari. Kita n’yo?

183 Oh, ginapahigawas sa Dios ang Iyang mga tawo usahay nga sama niana, ug ginaahit ang pipila sa kaugalingon nilang mga kabubut-on, ginapakita kanila nga dili nila mahimong buhaton kung unsa lang ang gusto nilang buhaton. Kabalo na mo kung

unsay akong pasabot. Wala sila'y—wala sila'y kagawasan nga buhaton kung unsa man ang gusto nilang pagabuhaton. Sa dili pa sila makaangkon og bug-os nga kagahum ug mamahimong ulipon-sa-gugma ni Cristo, kinahanglan una nilang maahitan ug pagkahuman igapresentar na. Usahay ginadala Niya sila ngadto sa kamingawan, aron buhaton ang ingon-niana, nga ahitan sila. Ug pagkahuman ipahigawas sila, nga mga dinihogan na, aron mamatuman ang katuyoan nga Iya nang gikatagana kanila. Nasabtan n'yo ba ang buot kong ipasabot?

Mga igsoon, ania na kita sa katapusang panahon.

¹⁸⁴ Hinumdumi ninyo, sa tanang uban pang mga panahon, kung unsay Iyang gibuhat. Sa kanunay kinahanglan Niyang mokuha og usa ka tawo ug himoon kining binilanggo ngadto Kaniya, nga ginatalikdan sa maong tawo ang kaugalingon niini. Kinahanglan niyang talikdan ang tanan nga nakat-onan niya, hikalmantan ang tanan niyang mga gibansay, ang tanan-tanan, aron nga mahibaloan ang kabubut-on sa Dios, ug aron sundon ang Dios.

¹⁸⁵ Dili niya mahimong sundon ang unsa mang butang nga kinahanglan buhaton sa tawo, ug sa Dios, sa mao rang higayon. Magkasukwahi kaayo, ang usa sa usa. Dili ka puedeng dungan nga moadto sa silangan ug sa kasadpan. Dili ka puedeng mopa-too ug mopa-wala sa mao rang higayon. Dili mo puedeng buhaton ang husto ug sayup sa mao rang higayon. Dili ka puedeng mosunod sa tawo ug sa Dios sa mao rang higayon. Dili, sir. Mahimong Dios ang ginasunod mo o kaha tawo ang ginasunod mo.

¹⁸⁶ Karon, nan, kung nagasunod ka sa Dios ug nahitugyan mo na ang imong kaugalingon ngadto sa Dios, kung ingon-ana nahimo ka nang binilanggo sa Dios, sa Pulong, og sa maong kabubut-on. Bisan unsa pa ma'y ginasulti ni kinsa man, nahimo ka na gyud nga usa—usa ka binilanggo Niini.

¹⁸⁷ Paminaw. Ania na kita sa katapusang panahon. Ug akong isulti kini nga may pagtahod ug pagrespeto, samtang nagakahurot na ang atong ulahing pipila ka minuto. Tan-awa. Ang pagabuhaton sa Dios, sa akong opinyon, ang kinahanglan Niyang buhaton, ug pagabuhaton sa niining kaulahiing adlaw, mao ang pagpangita og usa ka galamiton para sa mga anihon. Kinahanglan Niyang mangita og galamiton, aron sa pagpanggiuk. Ang si kinsa man nga mag-uuma, pagmoadto na siya aron mangani, kinahanglan nga aduna siya'y galamiton sa pagbuhat niini; sigurado, kinahanglan nga aduna siya'y mahait nga galab o ingon niana, usa ka galamiton, aron galabon ang mga trigo. Ug gulang na ang anihon.

¹⁸⁸ Dios, guniti kami sa Imong kamot. Himoa kaming mga ulipon sa Imong gugma. Gamita kami ingon nga galamiton, sa pagpaamgo sa niining makasasala, tinunglo na nga kalibutan

nga among gikinabuhian karon, nga si Jesus Cristo mao sa gihapon kagahapon, karon, ug hangtud sa kahangturan.

¹⁸⁹ Sa akong kaugalingon, Dios, tugoti ako nga mamahimong usa ka binilanggo. Kung isalikway man ako sa tanan kong mga kaigsoonan, kung isalikway man ko sa tanan kong mga higala, gusto ko gayu'ng mahimong binilanggo ni Jesus Cristo ug sa Iyang Pulong, nga mahiktan ako sa Iyang Pulong, pinaagi sa Balaang Espiritu, aron makita ang Balaang Espiritu nga ginapanghimatud-an ang Pulong sa Dios pinaagi sa mao rang mga butang nga Iyang gisulti nga pagabuhaton. Gusto kong mamahimong binilanggo ni Jesus Cristo.

Mag-ampo kita.

¹⁹⁰ Naghunahuna ko, karong gabhiona, samtang nagaduko ang atong mga ulo, kung ang ambisyon nga aduna kita, nga mamahimong unsa man, o tingali'g usa ka butang nga nahunahanan nato, butang nga mahakogon, unsa kaha kung medyo ipadaplin nato kana.

¹⁹¹ Nagahunahuna ko kung dunay usa ka batan-ong lalaki dinhi, karong gabhiona, sa paglantaw niya sa palibot, moingon, “Gusto kong, pagmodaku na ko, gusto kong mamahimong *ingon-ani-ingon-ana*.” Nagahunahuna ko kung imo kaha mabati ang kabubut-on sa Dios nga nagapanglihok diha sa imong kinabuhi, ug moingon ka, “Dili, dili. Uh-huh. Ako—akong... Wala na ang akong mga ambisyon karon. Sulod sa miaging pipila ka mga adlaw, nagpakigsulti gayud ang Balaang Espiritu kanako. Mao nga—ako—ako—gusto kong itugyan ang akong kaugalingon nganha sa Dios, aron mamahimong usa ka galamiton sa pagpangani sa niining kaulahiing adlaw.”

¹⁹² Aduna tingali dinhi og pipila ka mga batan-ong babaye nga adunay mga ambisyon nga mamahimong usa ka gining nga may maligdong nga pamatasan, o—o tingali'g mamahimong usa ka maanyag nga gining, o tingali'g sa umaabot nga adlaw himoon niyang propesyon ang Hollywood, ako—nagahunahuna ko kung andam kaha ka karon nga isurender ang imong ambisyon diha sa Presensiya sa Dios ug sa Iyang Pulong, patalinghugan ang pagtawag nga iya sa Dios sa imong kinabuhi mismo. Nakaila ang Dios kung si kinsa ikaw.

¹⁹³ Nagahunahuna ko kung aduna ba'y ministro nga ania sa duol, o usa ka alagad, usa ka magbubuhat sa kung asa man nga iglesia. Nagaanhi ra man gud ko dinhi, usahay. Mao nga—wala ako makaila sa usa sa tulo sa mga tawo nga nagapanglingkod dinhi, karong gabhiona, apan akong... gawas niining pipila ka mga tawo dinhi. Nagahunahuna ko kung aduna ba'y usa ka tawo, nga andam nang moingon, “Dili ko igsapayan kung unsa ma'y isulti ni kinsa man. Ako'y ulipon na sa Dios karon. Ako—iwali ko gayud ang Iyang Pulong, bisan unsa pa man. Dili ko igsapayan kung, ang akong—ipalagpot man ko sa akong organisasyon,

magpabilin sa gihapon ako niini nga Pulong. Ako—buhaton ko kini. Ang akong kabubut-on mao’y kabubut-on sa Dios. Ang kabubut-on sa Dios mao’y akong kabubut-on. Mamahimo akong usa na ka binilanggo ni Jesus Cristo. Pinaagi sa Iyang grasya ug tabang, buhaton ko kini.”

¹⁹⁴ Hunahunaa ninyo kini, samtang giduko nato ang atong mga ulo. Pila ba ang dunay ingon-niana nga ambisyon, niining gabhiona? Mahimo n’yo bang ipataas ang inyong kamot. Ingon niana ang akong ambisyon, usab. Isurender ko ang tanan-tanan. Samtang nagaduko ang atong mga ulo karon, sa hinay-hinay ha, ingon nga inyong ginahunahuna kini karon, samtang nagaampo kamo.

I surrender all,
I surrender all,
All to Thee, my blessed Saviour,
I surrender all.

I surren- . . .

¹⁹⁵ Sinsero ba gayud mo niini? “Gusto kong mamahimong usa ka binilanggo.”

Ako . . .

“Kuhaa ako, Ginoo. Dad-a ako ngadto sa balay sa Magkokolon, karong gabhiona. Dugmoka ako, ug umula ako pag-usab, dinhi mismo.”

. . . to Thee, my blessed Saviour,
I surrender all.

¹⁹⁶ Langitnong Amahan, samtang padayon nga ginatugtog ang maong alawiton, nahunahunaan ko nga labing mahinungdanon kini niining higayona, nga akong—akong hunongon usà ang pagkanta ug magpagkigsulti Kanimo sa makadiyut. Samtang nagapamalandong ang mga tawo, “Isurender ko ang tanan-tanan,” Amahan, hinaut nga buhaton namo kini, nga daw sa mao na kini ang katapusan namong kahigayonan nga buhaton kini. Tugoti kami nga mangduol nga dunay pagkasinsero, sa pagduol ngadto sa lamesa sa Ginoo, sama kaniadto, nga nahugasan na ang mga bisti, nahugasan ang mga kalag, nahugasan na ang mga kabubut-on, nahugasan na ang mga ambisyon, diha sa pagsurender sa among mga kaugalingon.

¹⁹⁷ Ug tugoti ang Dios nga kuhaon ang Iyang Pulong, nga ginayugohan kami uban Niini, ang Pulong sa Dios. Ug hinaut nga kuhaon kami sa Balaang Espiritu karon, samtang madungog namo nga nagalagitik ang yugo sa tibuok namong kasingkasing, “Sugod karong gabhiona, saligan Ko ikaw sa Imong pulong. Karon ayaw na hunahunaa ang kaugalingon mong panghunahuna. Hunahunaa ang Akong mga hunahuna. Hunahunaa ang Akong kabubut-on. Pangunahan Ko ikaw.”

Dios, itugot nga mamahimo kining usa ka kasinatian para sa matag usa kanamo.

¹⁹⁸ Ania kining mga batan-on nga nagalingkod dinhi; bana ug asawa; ug ang uban mamahimo pa lang nga bana ug asawa. Aduna usab og tigulang na nga mga kalalaken-an nga nagalingkod dinhi, mga ministro, nga dugay na diha sa ilang mga pagsangyaw. Ug, Ginoo, ania pud si Igsoong Neville, ako, nga nagapasaka na sa hagdanan. Inihap na lang ang among mga adlaw karon. Mas inampingan na ang among mga lakang kay sa kung unsa kami nagatikang kaniadto. Ginabantayan na namo ang among pagtikang. Dili na ingon-niana ka lig-on ang among mga tiil, sa pisikal nga pagkasulti, sama kung unsa kami kaniadto. Apan, Ginoo, ingon nga makita na namo kining mortal nga kinabuhi nga nagakunhod na, ug walay ni usa sa among mga lakang ang sigurado kung dili Mo pagagunitan ang among kamot.

¹⁹⁹ Karon, Dios, agaka kami, mahimo Mo ba? Kuhaa ang among mga kasingkasing ug ang among kabubut-on sa Kaugalingon Mong kamot, ug tugoti kami nga mamahimong mga binilanggo, karong gabhiona, ngadto sa Pulong, ngadto kang Cristo. Hinaut nga magkinabuhi kami og diosnon nga mga pagkinabuhi dinhi. Hinaut nga kining mga kababayan-an, kining batan-ong mga kababayan-an, kining batan-ong mga kalalaken-an, mga babaye ug mga lalaki, isurender nila ang ilang kinabuhi, Ginoo. Ug hinaut nga ang ilang ambisyon mamahimo nang ambisyon nga alagaran si Jesus Cristo. Ug tugoti kami nga mamahimong binilanggo sa Iyang Balaanong grasya ug kabubut-on. Itugot kini, Ginoo.

²⁰⁰ Mao lang kini ang nahibaloan kong buhaton, Ginoo. Kining binugto-bugto nga mga pulong, ug ako—nagasalig ko nga Imo rang iplastar ang mga niini, sa husto gayud. Tungod kay, mainit dinhi, ug gusto pa unta sa mga tawo nga maminaw, apan mainit lang gyud. Ug daghan ang kinahanglan nga mamauli na ug tungod nga motrabaho pa og sayo. Apan hinaut nga nahitisok na gayud ang maong mga binhi sulod sa ilang kasingkasing, “usa ka binilanggo.”

²⁰¹ Manguli unta sila ug moingon sa ilang asawa, samtang sila . . . sa dili pa sila mangandam aron moluhod ug mag-ampo, niining hapon, o niining gabhiona, sa kiliran sa ilang higdaanan, motan-aw sa usa’g usa, moingon, “Mahal, kumusta ka na man, karong gabhiona? Nahimo na ba gyud kaha kitang mga binilanggo ni Cristo ug sa Iyang kabubut-on, o—o nagapamuhat pa ba kita pinaagi sa kaugalingon natong kabubut-on sa gihapon?”

²⁰² Hinaut kining batan-ong mga kalalaken-an ug batan-ong mga kababayan-an, asa man sila dinhi, ilabina kadtong nagpatalinghug sa Mensahe, karong gabhiona, ilang ipangutana

kanang mao ra nga pangutana sa ilang mga kaugalingon, “Andam na ba gyud kaha ako nga mamahimong usa ka binilanggo, nga pagatalikdan ang mismo kong kinabuhi?”

²⁰³ “Ang nagaluwas sa iyang kinabuhi mawagtang kini kaniya, apan siya nga mawad-an sa iyang kinabuhi tungod Kanako makakaplag siya niini.” Amahan, nasayod kami, nga kana mao’y: mamahimong binilanggo Kanimong, ang walaon ang kaugalingon namong mga ambisyon ug ang kaugalingon namong mga tinguha, aron hibaloon ang sa Imo, aron magkaaduna kami og Kinabuhing Walay Katapusan. Itugot kini, Ginoo.

²⁰⁴ Ang butang lang nga nahibaloan ko, mao ang itugyan kini nganha sa Imong kamot. Ug hinaut nga magmabungahon kini ug maghimo og daghang—halangdong mga galamiton alang sa kaulahiang adlaw nga pag-ani, mga kalalaken-an ug mga kababayen-an, mga lalaki ug babaye, nga bug-os nang nahitugyan ngadto sa kabubut-on sa Dios, ug nahimong mga binilanggo ni Jesus Cristo, sa Iyang gugma, mga naposasan na sa mga kadena sa Balaanong gugma ni Cristo. Amo kining ginapangamuyo sa Iyang Ngalan.

I surrender all,

Manindog kita.

I surrender all,

All to Thee, my . . . ? . . .

²⁰⁵ Ato kanang isulti pag-usab, samtang nakapiyong ang atong mga mata ug nakataas ang atong mga kamot.

I surrender all,

I surrender all,

All to Thee, my blessed Saviour,

I surrender all.

²⁰⁶ Karon, kung mahimo iduko nato ang atong mga ulo, ug sa dili pa kantahon ang pangpauli na nga alawiton, nga *Take The Name Of Jesus With You*, hangyoon ko ang—ang kining igsoong lalaki dinhi . . . nalimtan ko ang iyang ngalan. Ang igsoong babaye nga nag-testimonyo mahitungod sa iyang nakita nga kangitngit nga nagapaibabaw kaniya, naayo na. Ug hinumdumi, nga iyang pagtan-aw og balik, nawala na ang maong taptap. Ang iyang pagtoo ang nagbuhat niadto. Ipapauli mo na kami diha sa pag-ampo, mahimo ba, igsoon? Ug pangayoon ang mga panalangin sa Dios para kanato.



USA KA BINILANGGO CEB63-0717

(A Prisoner)

Kining Mensahe ni Igsoong William Marrion Branham, una giwali sa Ingles niadtong Miyerkules sa gabii, Hulyo 17, 1963, sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org